

Carta Cha Xihna Ri Sacuhun Ra Apóstol Pablo Chi Ñáyivi Ñuu Corinto Cha Yihí Cuenda Nyoo

Nu tyaá ra Pablo noo tutu chi ñáyivi
ñuu Corinto cha yihí cuenda Nyoo

1 Yuhu ra Pablo, nacana Nyoo
chii vatyi cuñí ra cha cuvi noo
apóstol ra Jesucristo, o cuñí chi
catyí vatyi tachi ra chii nacaque
tyiño ra. Yuhu chihin ra Sóstenes
yañi yo ²saquichí ndi noo carta
ihya chi ndo cha nyicú ndo vehe
ñuhu cuenda Nyoo cha nyaá ñuu
Corinto. Ñáyivi chi Nyoo cuví ndo
vityin, cha cuenda cha ndu iin ri
ndo chihin ra Cristo Jesús. Nyoo
nacana ra chi ndo vatyi nanduvi
ndo noo ñáyivi vaha cuenda ra,
chihin tandihi ñáyivi cha sacahnú
chi Sutu Mañi yo Jesucristo tandihi
ri ityi. Vatyi cuví ra Nyoo cuenda
ñu ta cuenda maa yo ñandihí.
³Nyoo Sutu yo ta Sutu Mañi yo
Jesucristo na nasoco ra chi ndo, ta
nacuhva ra cha taxi ri coo ánima
ndo.

**Yoso caa nasocó Nyoo chi
ñu yihí cuenda ra**

⁴Tycuan ri nacuhvé tyahvi nyoo
chi Nyoo cha catyi maa ndo, vatyi

chaha ra cha vaha chi ndo cuenda
ra Cristo Jesús. ⁵Ta cha iin ri cuví
ndo chihin ra Cristo, Nyoo chahá
ra tunyee iñi ra chi ndo tacuhva
cuví cahán ndo tuhun ra. Ta chahá
ra cha chiñi tuñi vaha chi ndo. ⁶Ta
tandihí cha catyi chi ndo, tuhun
ra Cristo, cuahán chino cava ñáyivi
ndo vityin. ⁷Yucuan chaha ñahri
cha cumañí chi ndo. Chahá Nyoo
tandihí cha vaha chi ndo cha ni ri
ca cha nyatú ndo quívi quichi Sutu
Mañi yo Jesucristo. ⁸Nyoo cusaha
cuenda ra chi ndo nyacua nya naa
ñáyivi tacuhva yori cuví catyi ñáá
cha catyi chi ndo quívi quichi Sutu
Mañi yo Jesucristo. ⁹Nyoo tycuan
ri sacuví ra tari cuhva catyi ra. Ta
maa ra cuví ra nacana chi ndo tyi
cu iin ri ndo chihin Sehe ra, ra
Jesucristo, Sutu Mañi yo.

**Tatu yihí yo cuenda Sutu Mañi
yo, ña vaha cha cusiiin yo**

¹⁰Yañi, chiquén chi ndo chihin
sivi Sutu Mañi yo Jesucristo, na
iin ri cuvi ndo ta ma cusiiin ndo.
Ta iin ri cuhva caça xiñi ndo. Ta
iin ri tuhun quihí iñi ndo. ¹¹Catyí

chi ndo tyehe caa, yañi, tyi catyí ñáyivi chi ra Cloé chii, vatyí iyó tisihi nu nyicú ndo. ¹²Vatyí nyoho siin siin cuhva cahán ndo. Noo ndo catyí ndo: “Yuhu, cuenda ra Pablo yihí.” Inga ndo catyí ndo: “Yuhu, cuenda ra Apolos yihí.” Inga ndo catyí ndo: “Yuhu, cuenda ra Pedro yihí.” Inga ndo catyí ndo: “Yuhu cuenda ra Cristo yihí.” ¹³¿Atu tahvī sava ra Cristo? ¿Atu chihī yuhu ra Pablo nu cruzi cha catyí ndo? ¿Atu condutyā ndo chihin sivi yuhu? Ñima. ¹⁴Tyahvi nyoo chi Nyoo vatyí yuhu ña sacondutyē chi ni noo nyoho. Soco noo ri sacondutyē chi ra Crispo ri chihin ra Gayo ri. ¹⁵Tyicuan caa ta ni noo ndo ta ma cuvi catyí ndo vatyí condutyā ndo chihin sivi. ¹⁶Aan, ta suri sacondutyā tiqui chi ñáyivi chi ra Estéfanos. Soco ña nicohón iñi cha sacondutyē chi inga ndo. ¹⁷Vatyí ra Cristo ña tachī ra chii tyi sacondutyē. Soco tachī ra tyiño chii vatyí cahin tuhun ra yoso caa sacacú ra chi yo. Soco ña cahín chihin cha chiñi tuñi ñáyivi ihya, coto catyí ñáyivi chii tyi ñahri yahvi nyaá cha chihī ra Cristo cuenda cuatyí yo.

Vaha ca cha chiñi tuñi Nyoo ta ñima ca cha chiñi tuñi ñáyivi ihya

¹⁸Tuhun cha chihī ra Cristo nu cruzi cha catyí cuatyí yo, ñima ri tuhun cuví cuan cha cuenda chi ñáyivi cha cunaa nu cuví anyaya. Soco cha cuenda chi maa yo cha cuví yo ñáyivi cacú añima, tunyee iñi cha chahá Nyoo chi yo cuvi cuan. ¹⁹Vatyí tyicuan caa tucu catyí maa tuhun Nyoo:

Cusanai cha chiñi tuñi ra cuñí maa tyi chitó xaan.

Ta cha chitó xaan ra chiñi tuñi cutave iin chiyo xiin, catyí Nyoo.

²⁰Ñahri tuhun cha chitó xaan ra chiñi tuñi, ta ra sacuaha, ta ra chitó xaan nacahan ñáá ndihī tuhun iyó siqui ñuhu ñáyivi ihya. Vatyí cha chiñi tuñi cha iyó siqui ñuhu ñáyivi ihya, cha ñima ri tuhun nasahā Nyoo chi cuan. ²¹Nyoo chihin cha chiñi tuñi ra tyaá ra cuhva vatyí ma cuvi cohon nuu ñáyivi chi ra chihin cha chiñi tuñi cha iyó siqui ñuhu ñáyivi ihya, soco tyaá ra cuhva vatyí sacacú ra chi ñu chinó iñi tuhun cha cahan noo ñáyivi nuu ñu. Vasi ñima ri tuhun cuví tuhun cuan cha cuenda ñu cha ña ñohó nuu chi Nyoo.

²²Vatyí ñáyivi Israel cuñí ñu nyehe ñu milagru. Ta ñu Grecia maa maa ri maa cha chiñi tuñi ñáyivi ihya nanducú ñu. ²³Soco yoó sacotó yo tuhun ra Cristo, ra chihī nu cruzi. Ta ñáyivi Israel cahán nuu ñu chiñí ñu tuhun ihya. Ta ñu cha ñima ñu Israel cuví, cuñí maa ñu tyi tuhun cha ñima ri tuhun cuví ihya. ²⁴Soco cha cuenda chi ñu nacana Nyoo, an cuví ri ñu ñu Israel, o ñu Grecia, ra Cristo cuví tunyee iñi ta cha chiñi tuñi Nyoo. ²⁵Vatyí cuñí maa ñáyivi vatyí noo cha ñima ri tuhun cuví cha sacuvi Nyoo. Soco chiñi tuñi xaan ca Nyoo ta ñima ca ñáyivi iyó siqui ñuhu ñáyivi ihya. Ta cuñí maa ñáyivi tyi ña ñihí fuerza Nyoo. Soco ican cuan cuví fuerza cha ñihi ca cha nuu fuerza tandihī ñáyivi. ²⁶Yañi, cuñí chi coto ndo vatyí Nyoo nacana

ra chi ndo vasi maa ri ñáyivi soho cuví ndo, ta mañi ndo cuví ndo ñáyivi tyayii o ñáyivi chitó xaan cha chiñi tuñi ñayivi ihya. ²⁷Soco Nyoo nacachi vaha ra chi ñáyivi soho. Vatyí cuhvá ñu ticahan nuu chi ñu cuñi maa tyi chiñi tuñi xaan. Ta nacachi vaha ra chi ñáyivi ñahri fuerza vatyí cuhva ñu ticahan nuu chi ñu cuñi maa tyi iyó xaan fuerza. ²⁸Nyoo nacachi vaha ra chi ñáyivi ndahvi cha cuñi maa ñáyivi tyi ña chiñuhú ñu. Nacachi ra chi ñáyivi cha ña cuñi nyehe ñáyivi chii, vatyí sanocuee ra chi ra cuví tyiño nahnu. ²⁹Tyicuan caa sacuvi Nyoo tacuhva tyi yori sacahnú chii nuu ra. ³⁰Soco maa maa Nyoo sacu iñ ri ra chi yo chihin ra Cristo Jesús. Ta sacuvi ra tyi ra Cristo cuhva ra cha chiñi tuñi chi yo, ta sacuvahá ra chi yo ta sandundi ra chi yo nuu Nyoo vatyí tyiyahvi ra chihin niñi ra cha catyí cuatyí yo, tacuhva cuví cacu yo. ³¹Yucuan chaha sacuvi yo tari cuhva catyí nu tutu Nyoo tyehe caa: “Tatu yóo cha cuñi cuyaa, vaha na cuyaa maa soco chihin Nyoo.”

Tuhun ra Cristo, ra chihí nu cruzi

2 Soco yañi, quivi chahin chicahin tuhun Nyoo chihin ndo, ña cahin tuhun cha chiñi tuñi ñuhu ñayivi ihya. ²Soco maa ri maa tuhun ra Jesucristo, yoso caa chihí ra nu cruzi cha catyí cuatyí yo tyai xiñi ta nacatyí chi ndo. ³Ta chaj nu nyicu ndo tari cha ñahri fuerze. Ta nihí chihin cha yuhvi. ⁴Ta cuhva cha cahin nuu ndo, ña cahin chihin tuhun tyaqui tuhun cha chiñi tuñi tari cahán noo ra chitó xaan. Ñima.

Soco chihin fuerza maa Tatyí Ii Nyoo cahin chihin ndo. ⁵Tacuhva vatyí nachino iñi ndo chi Nyoo soco cha cuenda fuerza maa Nyoo. Ta ñima cha cuenda cha chiñi tuñi ñayivi ihya.

Nyoo chahá ra cha cohon nuu yo chi ra chihin Tatyí Ii ra

⁶Soco suvita ri tyi cahán ndi tuhun cha chiñi tuñi chihin ñu cha ñihi ca nyaá chihin tuhun Nyoo. Soco cha chiñi tuñi Nyoo, ta ñima cha chiñi tuñi ñuhu ñayivi ihya, ni ri cha chiñi tuñi ra nyacá ñaha siqui ñuhu ñayivi. Vatyí maa ra cucunaa ra. ⁷Soco tuhun xehe cha chiñi tuñi maa Nyoo cahán ndi. Vatyí Nyoo chicumi xehe ra minoo tuhun vaha nya ta ni cumañi chino ñuhu ñayivi ihya. Vatyí tyaá ra cuhva tyi cucacu ñima yo ta cunyaa yo noo nu vaha chihin ra tyicuan ri maa. ⁸Ta tuhun ihya ta cutuñi ca iñi ni noo ra nyacá ñaha ñuhu ñayivi ihya. Vatyí tyehe ta cutuñi iñi ra, ma catyaa ra chi Sutú Mañi yo, ra nyacá ñaha gloria, nu cruzi. ⁹Soco tari cuhva catyí maa tuhun Nyoo:

Nyoo sanduvahá ra noo cha vaha xaan tyi cuhva ra chi ñáyivi cha cuñi chi ra.

Ta ni noo ñáyivi ta nyehe ca ñu, ta ta cuiñi ca ñu, ta ta ndichi ca xiñi ñu yoso cuhva cha vaha cha chahá Nyoo chi yo, catyí tuhun Nyoo.

¹⁰Soco Nyoo chahá ra Tatyí Ii ra vatyí cutuñi iñi yo tuhun ihya. Vatyí Tatyí Ii ra sañahá chi tandihi chi yo nyacua nya tuhun cha xehe ca cha cumi maa Nyoo.

¹¹Ma cuvi coto noo ra cha chicá xiñi inga ra. Soco suri maa ra chitó ra cha chicá xiñi maa ra. Ta tyicuan caa tucu noo ri Tatyí li Nyoo chitó cha yihí iñi maa Nyoo. ¹²Yoó ñima cha chiñi tuñi ñuhu ñayivi naquehen yo, soco maa Nyoo chaha ra Tatyí li ra chi yo vatyí sacoto chi chi yo yoso caa cha tyaqui cha chahá Nyoo chi yo. ¹³Tuhun cha cahán ndi chihin ndo ihya, tuhun cha sañahá maa Tatyí li Nyoo chi ndi cuví. Ñima tuhun cha cutuhva ri maa ndi chihin cha chiñi tuñi xiñi ndi. Nacatyí ndi tuhun cha sañahá Tatyí li Nyoo chi ndi chi ñu cha yihí Tatyí li Nyoo chi.

¹⁴Soco ñu cha ña yihí Tatyí li Nyoo chi, ña cutuñi iñi ñu ta ña cuñi ñu cuñi ñu cha sañaha Tatyí li Nyoo chi ñu, vatyí cuñi maa ñu tyi tuhun cha ñima ri tuhun cuví cuan. Vatyí iin ri maa ñu cha yihí Tatyí li Nyoo cuví cutuñi iñi ñu tuhun cuan. ¹⁵Soco ñu yihí Tatyí li Nyoo cuví cutuñi iñi ñu. Ta chitó ñu tatu vaha o ña vaha ñáá noo tuhun. Soco ma cuvi catyí inga ñáyivi tatu vaha o ña vaha cha caá ñima maa ñu. ¹⁶Vatyí tuhun Nyoo catyí chi: “Yori chitó tuhun cha chicá xiñi Sutu Mañi yo. Yori cuví sañahá chi Nyoo”, catyí tuhun Nyoo. Soco yoó cha yihí yo Tatyí li Nyoo, chitó yo cha chicá xiñi ra Cristo.

Ña tahán chi cunyicon yo chi noo ra yañi yo, chi Nyoo na cunyicon yo

3 Soco yañi, quivi cuan ña cuví cahin chihin ndo tari cahín chihin ñu saquehén ityi Tatyí li Nyoo chi, soco cahin chihin ndo tari cahín chihin ñu ni nachino iñi

chi Nyoo, tari cha vatyí ni nyihi ndo chihin tuhun ra Cristo cuví cuan. ²Cahin chihin ndo chihin tuhun cha ña yihí ri cutuñi iñi ndo. Tari chahá yo sicui coho cha lee cha ta cuvi ca cachi nyayu, tyicuan caa sacuví chihin ndo. Vatyí nyoho, quivi cuan ta cuvi ca chi ndo. iTa ni vityin ta ta cuvi ca chi ndo! ³Vatyí ni chicá ca xiñi ndo cuhva chicá xiñi ñáyivi iyó siqui ñuhu ñayivi ihya. Nyiyó iñi ndo. Iyó tisihi nu nyicú ndo. Cacusin ndo. Ni chicá ca xiñi ndo tuhun ñuhu ñayivi ihya. Ta nyacuví ndo tari nyacuví ñáyivi cha ña ñohó nuu Nyoo. ⁴Vatyí yihí ndo catyí ndo: “Yuhu cuenda ra Pablo yihí.” Ta inga ndo catyí ndo: “Yuhu cuenda ra Apolos yihí.” Cuñi chi catyí tyi nyacuví ndo tari nyacuví ñáyivi ña ñohó nuu chi Nyoo.

⁵Vatyí iyóó ra cuví yuhu, ra Pablo? Ta iyóó ra cuví ra Apolos? vatyí cañi tahan ndo cha catyí ndi. Vatyí noo ra casacotó tuhun Nyoo chi ndo cuví ndi. Ta yucuan chaha nachino iñi ndo chi Sutu Mañi yo. Ta noo noo ndi sacuví ndi tyiño cha catyí maa Nyoo tyi sacuvi ndi. ⁶Yuhu tachí chiti tuhun Nyoo ñima ndo. Ta ra Apolos chosó ra. Soco Nyoo sacuahnu ra tuhun ra ñima ndo. ⁷Ta yucuan chaha ni ri ra cha tachí ta ni ri ra cha chosó, ñahri ra cuví ra. Soco Nyoo cuví ra tandihi. Vatyí maa ra sacuahnú ra tuhun ra ñima ndo. ⁸Ra cha tachí ta ra cha chosó, iin ri ra cuví ra. Ta cuñihi ra nu vaha sahá Nyoo yoso cuhva tyiño sahá noo noo ra. ⁹Ta tyicuan caa nyuhu, sahatyiño ndi soco tyiño nuu Nyoo. Ta nyoho cuví

ndo tari noo ñuhú nu sahá tyiño Nyoo.

Cuví tucu ndo tari noo vehe cha cuahán savaha Nyoo. ¹⁰Catyí Nyoo tyi yuhu cuví tari noo ra cuví nuu cha sama vehe. Vatyí chaquín cuhva vehe cuan ta tyihí chaha chi ñuhú. Ta inga ra samá ityi siquí. Soco cuñí chi sahá ra cuenda yoso cuhva samá ra siquí cuan. ¹¹Ta yori cuví cacun inga cuhva vatyí cha caá cuhva cuan. Vatyí suri maa ra Jesucristo cuví cuhva cuan. ¹²Ta siquí cuhva cuan cuví sama yo chihin xuhun cuaan, chihin xuhun cuichin, chihin yuu tyaquí, o chihin vitu, o chihin tuñama o chihin ndaha numa. ¹³Soco quívi cutuñi chi ñáyivi, cunyehe ra Cristo tyiño sahá noo noo yo. Vatyí cuquichi ra chihin ñuhú. Ta ñuhú cuan cucahmi chi nya cha ña vaha. ¹⁴Ta tatu yihí ñu sacuvi ñu tyiño vaha, ma cayu chi. Cuñihi ñu cha cuhva Nyoo chi ñu. ¹⁵Soco tatu tyiño sahá ñu ta ndii cayu, cunaa tandihi tyiño sahá ñu. Cacu maa ñu soco tari noo ra cha cuyatyí ca quita nu ñuhú. Vatyí chiin cuii ri ca ta cayu ra.

¹⁶¿Atu ña chitó ndo vatyí vehe ñuhu Nyoo cuví chi ndo, ta Tatyí Ii Nyoo iyó ra añima ndo? ¹⁷Tatu nya noo ñu sativí vehe ñuhu Nyoo, Nyoo cusanaa ra chi ñu, vatyí vehe ñuhu Nyoo, cha ii cuví. Ta vehe ñuhu cuan ican cuví maa yo.

¹⁸Ni noo ndo ta ma sandavi ñaha ndo chi ndo. Tatu nya nyoho cuñí maa ndo tyi chitó xaan ndo cha chiñi tuñi ñayivi ihya, ndahvi saha ndo chi ndo tari noo ra cha ña chitó maa. Tyicuan ta Nyoo cuhva ca ra cha chiñi tuñi vaha chi ndo. ¹⁹Vatyí

cha chiñi tuñi ñayivi ihya cuví chi noo cha ñima ri tuhun nuu Nyoo. Vatyí tuhun Nyoo catyí chi: “Nyoo sanacavá ra chi ra chitó, suri maa nu trampa cha savaha ra.” ²⁰Ta catyí tucu chi: “Sutu Mañi yo chitó ra vatyí cha chicá xiñi noo ra chitó, cha ñima ri tuhun cuví.” ²¹Yucuan chaha ni noo ndo ña tahán chi sacahnú ndo chi ndo tatu nyicón ndo chi noo rayii. Vatyí tandihi cha iyó ta chi maa ndo cuví, tyi maa Nyoo chahá ra chi ndo. ²²Yuhu ra Pablo, ra Apolos, ra Pedro, maa Nyoo chahá ra chi ndi chi ndo tyi nacatyí ndi tuhun ra chi ndo. Ta ñuhu ñayivi ihya, ñayivi iyó yo, tuhun chihi, cha cuví vityin, cha cuvi nu cuahan ca chi, tandihi ta chi maa ndo cuví. ²³Ta siin ri, maa ndo, chi ra Cristo cuví chi ndo, ta ra Cristo, chi Nyoo cuví chi ra.

Ma sacahnu yo chi yo ta ni chi noo yañi yo

4 Cuñí chi vatyí nyehé ndo chi ndi tari noo ra sahá tyiño chihin ra Cristo. Vatyí tyaá Nyoo tyiño chi ndi vatyí sañaha ndi tuhun xehe ra cha ña chitó ñayivi nu quichí chi. ²Ta cuñí chi vatyí nyuhu cha cuví ndi musu Nyoo nyita ri quichahá ndi tandihi cha catyí ra chi ndi. ³Soco cha cuenda yuhu, ña quichahí tatu cahán ndo chii. O tatu cutuñí chii nuu noo ra cuví tyiño, ñahri cuende. Ta ni ri mai ta ña catyí tyi vahi. ⁴Vasi tuví iñi mai tyi ñahri ca cuatyí, soco ña cuñí chi catyí vatyí ñahri cuatyí nuu Nyoo. Vatyí nuu maa Sutu Mañi yo cucutuñí chi yo. ⁵Ican tuhun, nyoho ma cahan ndo chi ndi.

Cuatu ndo quivi quichi ra Cristo. Ta maa ra cutava nu ndichin cha ñohó xehe nu ñaa iñi. Vatyí cusanatuví ra cha caá ñaíma noo noo yo. Tyicuan ta Nyoo cutyiyahví ra yoso cuhva sacuví noo noo yo.

⁶Yañi, cahín tuhun ihya chihin ndo cuenda cha vaha chi maa ndo. Vatyí nyehé ndo cuhva iyé, ta cuhva iyó ra Apolos. Vatyí ña cahnu sahá ndi chi ndi. Ta tyicuan caa tucu maa ndo, cutuhva ndo sacuví ndo tari catyí nu tutu Nyoo: Ma cahnu saha ndo chi ndo. Ta ñima chi noo ri ra cuñi ndo. Soco inuu ri cuhva cuñi ndo chi tandihí ñáyivi. ⁷Ni noo ndo ta ña cahnu ca ra cuví ndo ican saha inga ndo. Vatyí cha iyó chi ndo maa ri maa cha chahá Nyoo cuví. Yucuan chaha ña tahán chi cha sacahnú ndo chi ndo, vatyí ñima maa ndo ñihí.

⁸Cha cuhva cha cuñi maa ndo vatyí tandihí tuhun Nyoo chitó ndo, ta ñahri ca cha cumañi chi ndo. Ta cuñi maa ndo tyi Rey cuví ndo. Ta ña chiñuhú ca nyuhu chi ndo, cuñi maa ndo. Vaha tyehe ta tyicuan caa, tacuhva vatyí cuví tucu nyuhu rey chihin ndo. ⁹Nyuhu cha cuví ndi apóstol, tari maa cha sandoq Nyoo chi ndi nya chata ca, cahvi iñi. Vatyí nyehé xaan ndi tindoho. Cuví ndi tari noo ra iyó cuatyí, ta tari quivi cha yahá policia chihin ndi ityi cahnu vatyí tacuhva tyi nyehe ñáyivi ta ángel chi ndi. ¹⁰Sahá ñáyivi tyi ra tondo cuví ndi cha cuenda ra Cristo. Ta nyoho cuñi maa ndo tyi chitó xaan ndo tuhun ra Cristo. Nyuhu cuví ndi tari noo ra cha ñahri fuerza, cha ni ri ca cha nyoho cuñi maa ndo tyi cuaha

xaan fuerza ndo iyó. Tasi cuñi nyehe ñáyivi chi ndi, ta chi nyoho sahá ñu ñáyivi. ¹¹Nya vityin, nyehé ndi tindoho. Chisocó ndi. Ityi ndi ndutya. Cumañi sahma ndi. Ñahri vehe ndi iyó. Ta ñáyivi, tasi iñi ñu chi ndi. ¹²Ta chitatú ndi cha sahá tyiño ndi chihin ndaha ndi. Cahán ñáyivi chi ndi. Soco nacahán ndi chihin cha vaha nu cahan ñu. Chicá nyicon ñu chi ndi soco cunyeé ndi. ¹³Cahán ña vaha ñu siqui ndi. Soco ña yatyín iñi ndi, vita ri chaha ndi tuhun chi ñu. Sahá ñu tari noo mihin chi ndi. Sahá ñu tari noo cha ña chiñuhú ca chi ñáyivi chi ndi. Tyicuan caa sacuví ñu nyacua nya vityin.

¹⁴Sacuhín tuhun ihya chi ndo, soco ñima ticahan nuu chahí chi ndo. Soco chahí tuhun chi ndo tari chahí tuhun chi sehi tyi cuñi chi ndo. ¹⁵Soco vasi uchi mil ra sacuahá sañahá tuhun ra Cristo chi ndo, soco ña cuaha sutu ndo iyó. Yuhu cuví sutu ndo cha cuenda tuhun ra Cristo Jesús. Vatyí sañahí chi ndo yoso caa cacú ñaíma ndo. ¹⁶Ta tyicuan caa catyí chi ndo na cunyicon ndo cuhva iyé.

¹⁷Yucuan chaha tachí chi ra Timoteo, sehi cuenda Sutu Mañi yo, nu nyicu ndo. Nii xaan iñi ra nyicón ra chi Nyoo. Ta cuñi xain chi ra. Maa ra cuasanicohon ra iñi ndo yoso cuhva iyé, vatyí chinó iñi chi ra Cristo. Cusañaha ra chi ndo yoso cuhva sañahí tandihí ri vehe ñuhu. ¹⁸Yihí nyoho cahnu sahá ndo chi ndo. Cuñi maa ndo vatyí ma cuhun que nu nyicú ndo. ¹⁹Soco tyai cuhva tyi cunyehe nu nyicu ndo cha numi ri, tatu Sutu Mañi yo ta cuñi

ra. Tyicuan ta cunyehe tatu ndicha cha iyó fuerza Nyoo chi ra cahnu sahá chii chiña, o tatu cacahán ri maa ra. ²⁰Vatyí tatu ndicha cha chahá ra cha cunyacá ñaha Nyoo chi ra, ma cahan ri ra. Soco cuatuví iñi yo vatyí nyaá fuerza Nyoo chihin ra. ²¹¿Ñáá cha cuñi nyoho vii? ¿Atu cha quichi tachi tuñi chi ndo, o cha quichi nyehi chi ndo chihin cha vita iñi?

**Nu cutuñi chi noo ra chiyo
chihin sihi queen**

5 Catyí ñu chii vatyí iyó noo nyoho cha iyó ndo chihin sihi queen ndo. Ihya cuví noo cuatyí cha cahnu xaan, vatyí ni ñu ña ñohó nuu chi Nyoo ta ña nyacuví ñu tari nyoho. ²iTa tyicuan caa ta cahnu sahá ndo chi ndo cha nuu cha cucuihyá iñi ndo! Cuñi chi vatyí catyí ndo chi ra cha nyacuví cha quiñi caa cuan vatyí ma cutahan ca ra chihin ndo. ³⁻⁴Vasi ña nyaí chihin ndo chihin coño ñuhu, soco cohon iñi ndo vatyí ñohó iñi tuhun ndo, tari cha nyaá mai chihin ndo cuví cuan. Ta cha sandaí tyiño ra cha sacuví cuatyí cuan chihin sívi maa Sutu Mañi yo Jesucristo. Cuñi chi tyi ndu iñi ri ndo. Ta saha ndo tuhun tyi nyaí chihin ndo. Ta cunyaa fuerza maa Sutu Mañi yo Jesús chihin ndo ñandihí. ⁵Tyicuan ta cuñi chi vatyí nacuhva cuenda ndo chi ra cuan chi cuihna, tacuhva nativi ndihí coño ñuhu ra. Ta cuhva cuví cacu añima ra quívi quichi Sutu Mañi yo Jesucristo.

⁶Ña tahán chi sacahnu ndo chi ndo chihin cha sacuví ndo. Vatyí

nyehé ndií ndo nyacuví ra cuan cha quiñi caa. ¿Atu ña chitó ndo noo tuhun cha catyí chi vatyí chihin chii ri yuchan iya ta nandaa nanií yuchan pan? ⁷Tava ñehe ndo yuchan iya chahnu cha cuví cha ña vaha cha sativí chi ndo. Tyicuan ta cuvi ndo tari pan cha ñahri yuchan iya yihí chihin, cha tuhva yo chachí cha vico pascua. Ta pan cuan, ican cuví ndo vatyí ra Cristo cuví mbee cha chihi cha catyí cuatyí yo. ⁸Yucuan chaha tahán chi cachi coo yo cuenda cha chihí maa ra Cristo cha catyí yo. Ta sandoó yo cha quiñi caa cha sacuví yo ityi chata cha cuví tari yuchan iya chahnu. Ta cahán yo maa maa ri cha ndicha chihin cha nií iñi yo. Vatyí cuví chi tari pan cha ñahri yuchan iya yihí.

⁹Nuu inga carta cha yaha saquichi chi ndo, catyí chi ndo vatyí nyoho ma cohon naha ndo tuhun chihin ñu cha sacuví cha iyó ri maa chihin ñusihi o rayii. ¹⁰Ta cha catyí chi ndo tyehe caa, ñima cha cuachiyo ndo ingaña ri nu nyicú ñu cha iyó chihin rayii o ñusihi, ta ñima yii ñu o ñasihi ra cuví, o ñu nyiyó iñi, o ñu suhú, o ñu sacahnú xitohyo. Vatyí tatu tyicuan caa, cuñi chi cha quita ndo ingaña ri ñuhu ñayivi. ¹¹Soco cha cuñi catyí chi ndo vatyí ma cohon naha ndo tuhun chihin noo ñu cha catyí vatyí hermano cuví ñu, ta iyó ri maa ñu chihin rayii o chihin ñusihi ta ñima yii ñu o ñasihi ra cuví, o nyiyó iñi ñu, o sacahnú ñu xitohyo, o cuendu ñu, o chihí ñu ndixi, o suhú ñu. Ñu cha caá tyehe caa, ni cha ma cunyaa ndo cachi ndo chihin ñu. ¹²⁻¹³Vatyí yoó ña

tahán chi sahá yo cuenda chi ra ña ñohó nuu chi Nyoo. Nyoo cuvi ra sahá cuenda chi ñu cuan. Soco nyoho cuñí chi sahá ndo cuenda chi ñu yihí cuenda Nyoo. Yucuan chaha tavá ñehe ndo chi ra iyó cuatyí chiña nu nyicu ndo.

Ma cacan yo cuatyí chaha noo yañi yo cuenda Nyoo nuu ra cuví tyiño

6 ¿Yoso caa quichi cuvi iñi nyoho chicán ndo cuatyí chaha tahan ndo nuu ra cuví tyiño cha ña yihí cuenda Nyoo chihin ndo, cha nuu cha sacotó ndo chi ra yihí cuenda Nyoo, tacuhva canyehé ra nya ra iyó cuatyí? ²¿Atu ña chitó ndo vatyi suri maa ndo cusandaa ndo cuatyí ñáyivi iyó siqui ñuhu ñáyivi ihya nu cuahan ca chi? Ta tatu maa ndo cusandaa ndo cuatyí cuan, ¿atu ma cuvi sandaa ndo noo tyiño cha ñima ri tuhun ihya? ³¿Atu ña chitó ndo vatyi nyacua nya ángel ta cutuñi chi ra nuu yo? ¡Ta nyaca cuví noo tuhun luhlu ñáyivi ihya! ⁴Yucuan chaha tatu iyó tisihi nu nyicú ndo, ¿ñáá tuhun cuahan ndo nuu ra cuví tyiño cha ña chitó tuhun Nyoo?, ta ñahri tyiño cuví ra cuan vehe ñuhu nu nyicú ndo. ⁵Ihya ndicha tuhun catyí chi ndo, na coo chiin ticahan nuu nuu ndo. ¿Atu yori ndicha cuii noo ra cuví sandaa noo tyiño yañi yo nu canyicú nyoho chiña? ⁶Vatyi cuahan ndo cua cacan ndo cuatyí chaha yañi yo cuenda Nyoo nuu noo ra cuví tyiño cha ña chiño iñi chi Nyoo.

⁷Cha iyó tisihi nu nyicú ndo, ña vaha. Vaha taxin ca cunyeer ri ndo tatu sacuvi ñu cha ña vaha chihin

ndo. Saña ndo, na suhu maa ñu cha chii ndo. ⁸¡Soco nyoho suri maa ndo sataśi ndihi ca iñi ndo chi ñáyivi, ta nyacua nya cha chii yañi ndo ta suhú ndo!

⁹⁻¹⁰¿Atu ña chitó ndo vatyi ñu quiñi iyó ma quihvi ñu nu nyacá ñaha Nyoo? Ma sandavi ñaha ndo chi ndo. Ma quihvi tandihi ñu iyó ri maa chihin ñusihi o chihin rayii cha tyicuan ri caa. Ta ni ri ñu cha sacahnú xitohyo, ni ri ñáyivi cha iyó ñasihi o yii, ta cavá noo ñu chihin inga ñaha o chihin inga rayii, ni ra iyó chihin tahan yii, ni ra suhú, ni ra nyiyó iñi cha tyayii, ni ra chiñí, ni ri ñu cuendu, ni ri ñu chitó yoso caa sacuvi cha quiñi caa, ma ñihi ñu cha vaha nu nyacá ñaha Nyoo. ¹¹Vatyi tyicuan caa cuví suhva nyoho. Soco Nyoo cha sandundií ra ñanima ndo chihin Tatyí li ra. Cha sacuvaha Sutu Mañi yo Jesucristo chi ndo nuu Nyoo.

Coño ñuhu yo cuví vehe ñuhu Nyoo

¹²Catyí chi tuhun vatyi libre iyó yo cha sacuvi yo tandihi cha cuñi yo. Cha ndicha cuví. Soco ña tandihi ta cuví chi cha vaha chi yo. Ndicha libre iyó yo cha sacuvi yo tandihi, soco saha yo cuenda tatu cha vaha cuví o cha ña vaha. Ta ma cuhva yo cha cunyaca ñaha chi chi yo. ¹³Catyí ñáyivi vatyi chahá Nyoo nyayu cha cuenda chichi yo. Ta chaha ra chichi yo cha cuenda cha cachi yo nyayu. Cha ndicha cuví. Soco ninduvi cuan cusanaa Nyoo quivi naa ñáyivi. Ta ña ndicha cha coño ñuhu yo cuví cha cuenda cha sacuvi yo cha ña vaha chihin ñusihi o chihin rayii. Vatyi coño ñuhu

yo cuenda Sutu Mañi yo cuví. Ta maa Sutu Mañi yo cuví ra cuenda coño ñuhu yo. ¹⁴Tari sanandoto Nyoo chi ra Cristo Jesús, tyicuan caa cusandoto ra chi yo chihin tunyee ñi ra.

¹⁵¿Atu ña chitó ndo vatyí tandihí yo cha yihí yo cuenda ra Cristo nanduvi yo noo coño ñuhu chihin ra? Ta noo noo yo cuví tari suhva ri coño ñuhu ra. ¿Atu quehen yuhu chihin coño ñuhu ra Cristo ta sativí chihin noo ñaha cata ñi? Ña tahán chi cunyacuvi yuhu tyicuan caa.

¹⁶¿Atu ña chitó ndo vatyí tatu noo rayii ndu ñi ri ra chihin noo ñaha cata ñi, noo ri coño ñuhu nanduví ra chihin ña? Vatyí nu tutu Nyoo catyí chi tyehe caa: “Cha ñanduvi ñu, noo ri nanduvi ñu.” Ta ña tahán chi cu ñi ri ra yihí cuenda Nyoo chihin ñaha cata ñi. ¹⁷Soco tatu noo ñáyivi nacuhvá cuenda ñu añima ñu chi ra Cristo, yucuan cuví nu quihví Tatyí li ra añima ñu ta noo ri nanduví ñu chihin ra.

¹⁸Sanaa ndo ñi ndo tatu quichi cuví ñi ndo chi ñusihi o rayii tatu ñima ñasihi ndo o ñima yii ndo cuví. Vatyí tandihí inga nu cuatyí cha nyacuví ñáyivi ña sativí chi coño ñuhu ñu. Soco ñu nyacuví cuatyí chihin cha iyó ñu chihin ñusihi o rayii cha tyicuan ri caa, sativí ñu coño ñuhu ñu. ¹⁹¿Atu ña chitó ndo vatyí coño ñuhu yo cuví vehe Tatyí li cha chahá Nyoo chi yo, vatyí cunyaa ra chihin yo? Yoó ñima maa yo nyacá ñaha yo chi yo, Nyoo cuví ra nyacá ñaha chi yo. ²⁰Vatyí Nyoo satá ra chi yo ta yahvi xaan chahá ra chi yo. Yucuan chaha cuñí chi vatyí sacahnú yo

chi Nyoo chihin coño ñuhu yo, ta chihin cha chiñi tuñi yo vatyí ñanduvi cuan, chi maa Nyoo cuví.

Chahá ra Pablo tuhun yoso caa coo ñu tandahá noo ñáyivi vaha

7 Ta vityin cuacatyí tuhun cha ndaca tuhun ndo chii nu tutu cha sacuhun ndo chii. Ndicha vatyí vaha cha ma tandaha yo. ²Soco vatyí iyó xaan tuhun cha quichí cuví ñi ñáyivi cha coo ñu chihin ñáyivi cha tyicuan ri caa. Yucuan chaha cuñí chi vatyí tahan tahan rayii coo noo ñasihi ra, ta tahan tahan ñusihi coo noo yii ñu. ³Na sacuvi rayii cuhva tahán chi chihin ñasihi ra. Ta tyicuan caa tucu maa ñusihi, na sacuvi ñu cuhva tahán chi chihin yii ñu. ⁴Ñaha sihi cuan ma cuví cunyaca ñaha ri maa ña coño ñuhu ña. Vatyí chi yii ña cuví coño ñuhu ña. Tyicuan caa tucu maa yii ña, ma cuví cunyaca ñaha ri maa ra coño ñuhu ra vatyí chi ñasihi ra cuví coño ñuhu ra. ⁵Coto ñaha ma cuhva ndo chi ndo chi tahan ndo. Tatu cuñí ndo nanducu ndo chi Nyoo chihin oración, ñi ri cuhva caca xiñi ñanduvi ndo. Ta ma cuhva ndo chi ndo chi tahan ndo suhva quivi. Yaha cuan tyicuan ta cuhva tucu ndo chi ndo chi tahan ndo coto ma cunye ndo. Ta coto nducu nyehe ra ña vaha chi ndo ta cahun ndo cunducu ndo inga ñusihi o inga rayii. Ta ña vaha cha tyicuan caa.

⁶Cha catyí chi ndo tyehe caa ñima cha catyí tyi tandaha ndo. Ña saniñí chi ndo cha tandaha ndo. Soco cuví tandaha ndo tatu cuñí ndo. ⁷Cha cuenda chi yuhu, vaha

ca coo maa ri maa ndo tari mai. Soco Nyoo siin siin fuerza chahá ra chi noo noo yo. Yihí yo chahá ra fuerza chi yo vatyí cuví coo maa ri maa yo. Ta yihí yo ña chaha ra fuerza cha coo maa ri maa yo.

⁸Chi ñu tyivaa ta chi ñu chihí yíi, chahí tuhun chi ñu. Vaha ca cha ma coo yíi ñu tari mai. ⁹Soco tatu ma cunye ñu cha ma coo yíi ñu, vaha ca cha tandaha ñu ta ñima ca cha quichi ri cuví iñi ñu tandaha ñu, ta ña tandaha ñu.

¹⁰Soco ñu cha yaha tandaha, catyí chi ñu vatyí ma sanandoo ñu chi yíi ñu. Cha ndicha cuví vatyí mandamiento ihya ñima cha ndichí xiñi ri cuví soco maa Sutu Mañi yo catyí. ¹¹Soco tatu noo ñaha sihi ta sanandoo ña yíi ña, cuñí chi vatyí ndoo ña cunyaa ña cha ma tandaha ca ña. O naquehen ña chi yíi ña. Ta suri tyicuan caa, ña tahán chi sanandoo rayíi chi ñasihi ra.

¹²Ta cha cuenda chi yuhu catyí chi inga ndo tuhun ihya. Vatyí tatu ñasihi noo hermano ta ña chinó iñi ña chi Nyoo, soco ndoo ña vaha cha cunyaa ña chihin ra, ñahri ityi iyó chi ra cha sanandoo ra chi ña.

¹³O tatu yíi noo hermana, ta ña chinó iñi ra chi Nyoo, soco ndoo ra vaha cha cunyaa ra chihin ña, ñahri ityi iyó chi ña cha sanandoo ña chi ra. ¹⁴Vatyí cha yaha nasoco Nyoo chi rayíi cha ña chinó iñi cuan cha cuenda cha iin ri cuví ra chihin ñaha cha chinó iñi cuan. Ta cha yaha nasoco tucu Nyoo chi ñaha cha ña chinó iñi chi Nyoo cha cuenda cha iin ri cuví ña chihin ra chinó iñi. Tatu ña nyacuví ndo tyicuan caa, sehe ndo cucuví

ndotyin tari sehe ñu cha ña chinó iñi chi Nyoo. Soco cha cuenda cha sacuví ndo tyicuan caa, nasoco Nyoo chi sehe ndo. ¹⁵O tatu rayíi o ñusihi cha ña chinó iñi chi Nyoo, ta cuñí ñu sanandoo ñu chi tahan ñu cha chinó iñi chi Nyoo, na sanandoo maa ñu. Tyicuan ta ra hermano o ñaha hermana ndoo ñu libre. Vatyí maa Nyoo cuñí ra vatyí coo vaha yo chihin cha ñahri tisihi. ¹⁶Vatyí ña chitó minoo ñaha sihi tatu cacu añima yíi ña saha ña. Ta ni ri noo rayíi ña chitó ra tatu cacu añima ñasihi ra saha ra.

¹⁷Ta tyicuan caa catyí chi ndo vatyí coo ndo yoso cuhva catyí Sutu Mañi yo chi ndo. Ta yoso cuhva iyó ndo quivi nacana Nyoo chi ndo. Ta tyicuan caa catyí chi tandíhi ñu yihí cuenda Nyoo noo noo vehe ñuhu. ¹⁸Tatu Nyoo ta nacana ra chi noo nyoho ta cha yaha sacuví ñu costumbre circuncisión chi ndo, ma caca iñi ndo. Soco tatu nacana ra chi noo ndo cha ña sacuví ñu costumbre cuan chihin ndo, ña tahán ca chi sacuvi ndo vityin. ¹⁹Ña niñi xaan cha sacuví yo, o cha ma sacuvi yo costumbre circuncisión cuan. Soco cha niñi ca cha quichahá yo tuhun cahán Nyoo. ²⁰Tahan tahan ndo cuñí chi ndoo ndo yoso cuhva cha iyó ndo quivi cha nacana Nyoo chi ndo. ²¹Vatyí tatu iyó chitoho ndo cha nyacá ñaha chi ndo quivi cha nacana Nyoo chi ndo, ma caca iñi ndo, soco tatu chahá chi cuhva cha ndoo ndo libre, cuñí chi nducu ndo cuhva ta ndoo ndo libre. ²²Vatyí quivi nacana Nyoo chi noo ra cha iyó chitoho, nduví ra tari noo ra cha libre iyó,

vatyí sacuví ra tyiño nuu Sutu Mañi yo. Ta suri tyicuan caa tucu ra cha iyó libre quivi cha nacana Nyoo chi ra. Vityin ra Cristo nyacá ñaha chi ra. ²³Sata Nyoo chi nyoho. Ta yahvi xaan chaha ra chi ndo. Yucuan chaha ma cuhva ndo cha cunyaca ñaha rayii chi ndo. Ta ma sacuvi ndo tyiño nuu ra. ²⁴Ta tyicuan caa catyí chi ndo yañi, coo ndo tari cuhva chiyo ndo quivi nacana Nyoo chi ndo.

²⁵Ta tyicuan tucu ñu cha ta tandaha ca. Ñahri tuhun chaha Sutu Mañi yo chii cha cuenda ndo. Soco catyí chi ndo yoso cuhva ndichí xiñi. Ta cuví naquehen ndo tuhun cahín tyi cha chitó ndo vatyí cha ndahvi cuñí Nyoo nyehe ra chii ta chaha ra tyiño ihya chii. ²⁶Cha cuenda chi yuhu, vaha taxin ca ma tandaha ndo. Vatyí cuaha xaan tindoho ñayiví cha iyó yo vityin. ²⁷Soco tatu cha iyó ñasihí noo hermano, ma nducu ra cuhva cha sanandoo ra chi ña. O tatu ta coo ca ñasihí ra, ma nducu ra chi ña. ²⁸Soco tatu tandaha ra, ñima cuatyí cuví. O tatu noo ñaha tyivaa tandaha ña, suri ñima cuatyí cuví. Soco ñu tandaha cuaha xaan tindoho cunyehe ñu ñayiví ihya. Ta yucuan chaha catyí chi ndo vatyí vaha ca cha ma tandaha ndo. Vatyí ña cuñí cha nyehé ndo tindoho ta tisihi cuan.

²⁹Yañi, cha vityin ta ityi nuu ña cuaha ca quivi nyaá. Cuñí chi vatyí ra cha iyó ñasihí cuví ra tari noo ra cha yori ñasihí. Vatyí nyita ri tahán chi caca xiñi ra tuhun Nyoo. ³⁰Ta tatu nyaá ndo tucuihya iñi, ma quichaha ndo tucuihya iñi cuan, o

tatu nyaá ndo tusii iñi, soco ma quichaha xaan ndo tusii iñi cuan. Ta tyicuan caa tucu tatu iyó xuhun ndo, ma quichaha xaan ndo xuhun cuan. Nacuhva ndo tandihi cuan chi Nyoo. ³¹Ta ra iyó xaan cha chii ñayiví ihya, ma quichaha xaan ra chi cuan, soco cotyiño ra tyiño Nyoo. Vatyí ñayiví cha nyehé yo ihya cha cuahán sandihi xaan chi.

³²Cuñí vatyí nyoho ma caca xaan xiñi ndo tuhun cha iyó ñayiví ihya. ñin ri maa tuhun Nyoo caca xiñi ndo. Noo ra tyivaa cha ta tandaha ca chicá xiñi ra yoso caa sacuví ra cuhva cuñí maa Sutu Mañi yo. ³³Soco tatu cha tandaha ra, chicá xiñi ra yoso caa coo vaha ra ñayiví cuhva tahan iñi ñasihí ra. ³⁴Ta siin cuhva iyó noo ñusihí cha cha yaha tandaha, ta siin cuhva iyó tucu noo ñusihí cha cumañi ca tandaha. Ñaha cha cumañi ca tandaha chicá xiñi ña ñin ri maa tuhun Sutu Mañi yo. Ta chicá xiñi ña yoso caa sacahnú ña chi Nyoo chihin coño ñuhu ña ta chihin cha ñi añima ña. Soco ñaha cha cha yahá tandaha chicá xiñi ña yoso caa coo vaha ña ñayiví ihya cuhva tahán iñi yii ña.

³⁵Catyí tuhun ihya chi ndo cuenda cha vaha chi maa ndo. Ñima cha saniñí chi ndo. Soco vatyí coo vaha ndo noo ñayiví chihin cha ñahri sayangá chi ndo. Ta ñin ri tyiño Nyoo sacuvi ndo.

³⁶Soco nya nyoho chicá xiñi ndo vatyí vaha cha tandaha ndo vatyí cha cuayaha quivi ndo; vaha, tandaha ndo tatu cuñí ndo. Ñima cuatyí cuví cuan. ³⁷Soco tatu inga ndo cha nacuaan vaha iñi ndo vatyí cuandoo ndo cha ma tandaha ndo,

vaha tucu. ³⁸Tu tandaha ndo, vaha. Tu ma tandaha ndo, vaha ca.

³⁹Soco catyí nu ley Nyoo chi yo vatyí tahán chi cunyacá ñaha rayíi chi ñasihi ra cha ni ri ca cha iyó ra. Soco tatu chihí ra, iyó ityi chi ña cha tandaha ña yóo chihin cuñí maa ña. Soco tatu ra yihí cuenda Nyoo cuví ra. ⁴⁰Soco vaha ca coo ña ñayiví tatu ma tandaha ña inga chaha. Ihya cuví cha chicá xiñi yuhu. Ta chahí tuhun ihya chi ndo chihin Tatyí Ii maa Nyoo, cahvi iñi.

Nu sañahá ra Pablo vatyí ma sacoo yo cuatyí inga ñáyivi

8 Ta vityin cuanacatyí chi ndo cuenda nyayu cha chahá ñu chi xitohyo. Tandíhi yo cha ñohó nuu ca yo chi Nyoo, chitó yo tatu vaha o ña vaha cachi yo nyayu cuan. Ta cha cuenda cha chitó yo, yucuan chaha cahnu xaan sahá yo chi yo ta sativí cuan chi yo. Soco cha cuñí yo chi tahan yo sandunyeé cuan chi yo. ²Tatu yihí ndo cha cuñí maa ndo tyi chitó ndo, cha cuenda vatyí ta coto ca ndo yoso cuhva cuñí chi cuví cuan. ³Soco Nyoo ñohó nuu ra chi ñu ñi vaha iñi cuñí chi ra.

⁴Ta vityin cha cuenda cha cachi yo nyayu cha iyó vico xitohyo: cha chitó vaha yo vatyí noo xitohyo ñahri maa vale chi, vatyí noo ri maa Nyoo iyó. ⁵Vasi cuñí maa ñáyivi vatyí cuaha xaan Nyoo iyó nu ñuhu ñayiví ihya ta andívi, ⁶soco cha cuenda chi maa yo noo ri Nyoo Sutu yo iyó. Ta maa ra savaha ra tandíhi cuii maa cha iyó. Ta yoó iyó yo cha cuenda maa ra. Ta iyó tucu noo ri Sutu Mañi yo Jesucristo.

Ta maa ra savaha tandíhi maa cha iyó, nyacua nya chi maa yo.

⁷Soco ña tandíhi yo chitó yo tuhun ihya. Vatyí suhva ñu tahan yo cuenda Nyoo, ta ni cumañi ca quihvi ñu cuenda Nyoo, sacahnu ñu xitohyo. Ta cha cañ ñu sacahnu ñu chi cuan ta cuñí maa ñu tyi nyitó xitohyo cuan. Vatyí ña ñi vaha iñi ñu nyicón ñu chi Nyoo. Ta tatu chachí ñu nyayu cha chahá ñáyivi chi xitohyo cuan, cuñí maa ñu vatyí chicoó cuatyí ñu cuenda xitohyo cuan nuu Nyoo. ⁸Soco Nyoo ñahri cuenda ra tatu chachí yo, o ña chachí yo. Ñima vatyí chachí yo ta ña vaha ca yo nuu Nyoo, ta ñima cha cuenda cha ña chachí yo ta vaha ca yo. ⁹Soco saha ndo cuenda nya ndo chachi nyayu cuan ta chitó ndo vatyí ñahri cuatyí ndo chicoo. Cuví sanacava ndo nuu cuatyí chi ñu ni quihvi ri cuenda Nyoo, vatyí ñu cuan cuñí maa ñu tyi chicoo cuatyí ñu tatu chachí ñu nyayu cuan. ¹⁰Vatyí tatu yoho cha chiton tuhun ihya, ta cunyaun ta cachun noo cha iyó vehe xitohyo, ta noo ra yañi yo cha ña ñihi vaha cuahán ra chihin Nyoo nyehé ra chuun yucuan, ra yañi yo cuan cucachi ndíhi ra chuhun. ¹¹Ta ra yañi yo cutiví añaima ra vatyí cuñí maa ra tyi chicoo cuatyí ra. Ta ra cuan chihí ra Cristo cha cuenda ra. Ta vityin chicoo cuatyí ra cuñí maa ra. Ta yoho cha chitón, sicun cahun cuatyí cuan. ¹²Yucuan chaha tatu sanacavá yo chi noo yañi yo cha ña ñihí vaha cuahán chihin Nyoo, chicoó cuatyí yo nuu ra Cristo. ¹³Yucuan chaha tatu sanacavé chi noo yañi yo nuu cuatyí cha cuenda

cha chachí, vaha taxin ca ma cachi ca mai coño, tacuhva cha ma sanacave chi ra nuu cuatyí.

Cha tahán chi sacuví ra apóstol Nyoo

9 Yuhu cuví noo ra apóstol Nyoo. Ta yori ñáyivi nyacá ñaha chii. Vatyí nyehí chi ra Jesús Sutú Mañi yo. Ta suri maa ndo cuví cha ndaa tyi ndicha cuví yuhu noo apóstol Nyoo, vatyí chinó iñi ndo tuhun Nyoo cha sacote chi ndo. ²Vasi ña cuñí ñáyivi chinó iñi ñu cha apóstol Nyoo cuví, soco cha cuenda nyoho ican cuví. Vatyí cha cuenda cha chinó iñi ndo chi Sutú Mañi yo, cuví ndo cha ndaa vatyí ndicha cha apóstol cuví.

³Ihya cuví tuhun cuacahin cuenda ñu cha cahán nyaa chii. ⁴Iyó chi ityi chii cha quehín tandihi cha chahá ñu cachi ta cha chahá ñu cohi. ⁵Ta siin ri cha coo noo ñasihi cha chinó iñi chi Nyoo, tari yañi ra Jesús, ta ra Pedro ta tandihi ca ra apóstol. ⁶O chicá xiñi ndo vatyí yuhu ri ta ra Bernabé tahán chi saha tyiño ndi chihin ndaha ndi ta sata ndi cha chiñuhú chi ndi. ¿Atu ña tahán chi chi nyuhu sandoo ndi tyiño cuan ta cahan ndi tuhun Nyoo? ⁷Ra cha cuví sindaro tyiyahví gobiernu chi ra ta chotyíño ra xuhun cuan. Ta ra cha tachí yoho tichaha ndivi, chachí ra tichaha ndivi cha quita nu iyó tyiño saha ra. Ta ra cha sahá cumi mbee chihí ra sicuí ti. ⁸Ta ma cuñi ndo vatyí tuhun ihya cha ndichi xiñi ri mai cuví. Vatyí nu ley cha tyaa ra Moisés catyí chi tyehe caa: ⁹“Ma tyihi ndo yoho yuhu quití cha sandundií trigó, vatyí tahán maa

chi cachi ti suhva trigu nu sahá tyiño ti.” Ndicha vatyí Nyoo catyí ra tyehe caa soco ñima vatyí cuniñi xaan cuñi ra chihin quití. ¹⁰Soco na cutuñi ca iñi yo vatyí tari ra tahví ñuhu ta ra cha tachí, tahán chi vatyí cuita iñi ra vatyí cunaquehen ra cha quita nu saha tyiño ra. ¹¹Ta tyicuan caa, tatu nyuhu quichi cahan ndi tuhun Nyoo chihin ndo, tari quivi cha quichi tachí ndi chiti cuvi cuan. Ta tahán chi tyi tyinyeé ndo chi ndi cha cuenda cha sacotó ndi tuhun Nyoo chi ndo. ¹²Tatu tyinyeé ndo chi inga ra cha ña quichi tyihi tuhun Nyoo nu nyicú ndo, tahán ca chi cha tyinyeé ndo chi nyuhu, vatyí nyuhu tyihi ndi tuhun Nyoo nu canyicú ndo.

Soco ña cahán ri ndi, ta cunyeé ndi tandihi. Ta ña sayangá ndi chi ndo chihin cha chiñuhú chi ndi. Tacuhva cha ma sandihi ndo tuhun ra Cristo. ¹³Chitó ndo tyi ra sahá tyiño vehe ñuhu ñáyivi Israel, iyó ra chihin cha iyó vehe ñuhu cuan. Vatyí tahán chi tavá siin ra suhva coño quití vatyí cachi ra. Ta tandihi ca coño cuan cucahmi ra tari cuhva catyí maa Nyoo chi ra. ¹⁴Ta suri tyicuan caa catyí Sutú Mañi yo, vatyí tahán chi tyinyeé ñu yihí cuenda Nyoo chi ra cahán tuhun Nyoo chihin ñu. ¹⁵Soco yuhu ni noo chaha ña chiquen cha tahán chi chii. Ta ni ña tyaí tuhun ihya vatyí cuñi cha cuhva ndo cha cuhva ndo chii. Vatyí tatu chiquén cha tahán chi chii, ña sii cuñi cahín tuhun Nyoo. Vaha taxin ca cuñi cha cúvi ta ñima ca cha caquen xuhun chi ndo.

¹⁶Cha cuenda chi yuhu ñima cha cahnu sahí chii cha cahín tuhun

Nyoo. Soco vatyí nyaá siqui cha sacuví. Soco ndahví cuví yuhu ra ndahví tatu ma cahin tuhun Nyoo ihya. ¹⁷Yucuan chaha tatu sacuví chihin cha iyó iñi, cuñihi yahví. Soco tatu sacuví chihin fuerza, suri cuví chi, vatyí noo tyiño cha tachí maa Nyoo chii tyi sacuví, tahán chi cha sacuví. ¹⁸Ta tyicuan caa, yahví cha ñihi, ican cuví cha sii cuñí cahín tuhun ra Cristo. Ta ña chiquén cha tahán chi chii cha cuenda cha cahín tuhun ra.

¹⁹Vasi ñima musu cuví yuhu. Soco nanduví musu tandíhi ñáyivi. Vatyí tyicuan caa saha ganaf cuaha ca ñáyivi cuenda ra Cristo. ²⁰Tatu ñohí nu nyicú ra Israel, nanduví tari maa ra tacuhva vatyí tyasoho ra tuhun cahin. Vatyí cuñi saha ganai chi ra cuenda ra Cristo. Vatyí ra cuan iyó ra cuhva catyí ley ra Moisés. Ta yuhu sacuví tari cuhva catyí ley cuan. Soco ñima ley cuan nyacá ñaha chii. ²¹Soco tatu cuñí saha ganai chi ñu ña quichahá ley ra Moisés, sacuví tari cuhva sacuví ñu. Vatyí tacuhva saha ganai chi ñu. Soco ley maa Nyoo nyacá ñaha chii vatyí chihin ley ra Cristo chicá noi ta ña cuví cunyacuví cha quiñi caa tari nyacuví maa ñu. ²²Tatu nyaí chihin noo ra cha ta coo vaha ca fuerza Nyoo chii, nanduví tari maa ra, vatyí tacuhva cahan que tuhun Nyoo chihin ra. Ta ndunyeé ca iñi ra chihin tunyee iñi Nyoo. Nanduví yuhu tari cuhva caa noo noo ñáyivi, vatyí tacuhva tyasoho ñu tuhun Nyoo cha cahín ta cacú ñima ñu. ²³Tyicuan caa sacuví tacuhva cuví sacoté tuhun Nyoo chi ñáyivi. Vatyí tacuhva ñihi tumañi iñi cha chahá maa Nyoo chi yo.

²⁴Chitó ndo vatyí noo sihva cha chinó ñu, tandíhi ñu chinó, soco noo ri ñu sahá ganaa. Tyicuan caa tucu maa yo, cuñí chi cha ñihi cunyicon yo chi Nyoo tacuhva sahá ganaa yo nu vaha cha chahá ra chi yo. ²⁵Tandíhi ñu cuahan sihva, sandoo ñu tandíhi cha satyoño chi ñu vatyí cuñí ñu sahá ganaa ñu. Ta ñu cuan, cusaha ganaa ñu, soco noo corona numa cha tañi tyehe ri na ityi. Ta yoó nducú yo cuhva soco cha sahá ganaa yo noo cha ma tiví ca maa. ²⁶Cha cuenda yuhu ña chinó tondo ri mai, ni ña cañí tahan tondo ri mai. ²⁷Soco ñihi nyacá ñahi chi coño ñuhi. Ta saniñí quichahí chi Nyoo. Coto suri mai cha yaha sañahí chi inga ra ta ndoí.

**Nu sañahá ra Pablo vatyí
ma tyaa xiin yo Nyoo**

10 ¹⁻²Yañi, ña cuñí cha naa iñi ndo cha cuví chi sutu chahnu yo ta cha nahá. Nyoo tyinyee ra chi ñu, ta tachí ra noo vico vatyí cahun ityi nuu ñu coto cunaa ñu. ñin ri nanduví ñu chihin ra Moisés, ra cuví nuu chi ñu, ta yahá sava ñu tyañuhu. Ta cha tyicuan caa, tari cha condutya ñu chihin vico cuan ta chihin tyañuhu cuví cuan. ³Ta tandíhi ñu chachí ñu ñin ri nyayu cha chahá maa Nyoo. ⁴Ta tandíhi ñu chihí ñu ñin ri ndutya cha chahá maa Nyoo. Vatyí ndutya cuan tava ra chata noo yuu cha cuahan chihin ñu. Ta yuu cuan ra Cristo cuví. ⁵Soco vasi nyehe ñu cuaha milagru cha sacuví Nyoo, cuaha ñu ña quichahá ñu tuhun cahan ra chihin ñu. Ta chihí ñu chiqui ndii cuan, ta yucuan ndoo ñu.

⁶Tandihí tuhun ihya chahá chi noo cuhva chi yo. Vatyí tacuhva ma cuñi yo sacuvi yo cha ña vaha tari sacuvi ñu cuan. ⁷Yucuan chaha ma sacahnu nyoho chi xitohyo, tari chinyacuvi suhva ñu cuan ta cha naha, tari catyí nu tutu Nyoo tyehe caa: “Ta cachiyo ñu vico, ta cachachi ñu, ta cachihí ñu.” ⁸Ta ma coo ri maa yo chihin inga ñusihi o chihin inga rayíi tatu ñima ñasihi yo cuví, o yíi ñu cuví, tari chinyacuvi suhva ñu cuan. Ta noo ri quívi chihí oco uñi mil ñu cha cuenda cha chinyacuvi ñu cha quiñi caa cuan. ⁹Ta Sutu Mañi yo cama iñi ra, soco ña tahán chi nducú nyehe yo chi ra. Tari chinyacuvi suhva ñu cuan. Ta cachihí ñu cha tyaa coo chi ñu, cha cuenda cha cuñi ñu nducú nyehe ñu chi ra. ¹⁰Ta ni ma cahan ña vaha ndo siqui Nyoo, tari cahan ña vaha suhva ñu cuan siqui ra. Ta saquichi ra ángel cuenda ra ta chahñi ra chi ñu.

¹¹Tandihí ihya cuví chi sutu chahnu yo cha chiyo ta cha naha. Ta chicunyaa chi nu libru Nyoo tari noo cuhva vatyí sacotó ra chi yo cha iyó yo ñayivi ihya vityin, nu cuahán sandihí chi. ¹²Ta tyicuan caa tatu tuví iñi maa ndo tyi vaha cuahán ndo chihin Nyoo, ñasaha ndo cuenda coto canacava ndo saha ra ña vaha. ¹³Tindoho cha nyehé ndo, cuñi maa ndo tyi noo ri maa ndo nyehé tindoho cuan. Soco inuu ri nyehé tandihí ca ñu. Soco cuví cunyeé iñi ndo chi Nyoo, ta maa ra ma cuhva ra nyehé ndo tindoho cha ma cunyeé ca ndo. Soco tatu chaa tindoho chi ndo, tyicuan ta Nyoo cunducu ra cuhva cha quita ndo

chichi tindoho cuan ta cuví cunyeé ndo.

¹⁴Yucuan chaha yañi, ma sacahnu ndo chi xitohyo. ¹⁵Cahín chihin ndo tari cahín chihin noo ra tyihí tuñi iñi. Yucuan chaha saha ndo cuenda cha catyí chi ndo. Ta nyehe ndo tatu ndicha o ña ndicha tuhun cahín chihin ndo. ¹⁶Quívi cha nicohón iñi yo tyi chihí ra Cristo nu cruzi, chihí yo vinu ta chachí yo pan. Ta vinu cuan cuñi chi catyí vatyí iin ri cuví yo chihin ra Cristo cuenda niñi ra. Ta chachi yo pan ta cuñi chi catyí vatyí iin ri cuví yo chihin ra cuenda coño ñuhu ra. ¹⁷Vatyí vasi cuaha yo, soco tandihí yo chachí yo noo ri pan. Ta yucuan chaha tandihí yo nduví yo noo ri coño ñuhu ra.

¹⁸¿Atu nicohón iñi ndo yoso caa iyó ñu Israel? Chachí tucu maa ñu quiñi cha chahá ñu chi Nyoo, ta cha cuenda cha nyacuví ñu cha tyicuan caa, iin ri cuví ñu chihin cuan. ¹⁹Ñima cha catyí chi ndo tyi vale xitohyo cha sacahnú ñu ña ñohó nuu chi Nyoo. Ña vale, ni ri coño cha chahá ñu chi xitohyo cuan ta ña vale. ²⁰Soco catyí chi ndo vatyí ñu ña ñohó nuu chi Nyoo chahá ñu cha chahá ñu, soco chi ra ña vaha. Ta ñima chi Nyoo. Ta ña tahán chi cha ndu iin ri ndo chihin ra ña vaha. ²¹Vatyí ma cuvi coho yo copa Nyoo ta suri cuhva cuan ta coho tucu yo copa ra ña vaha. Ta ma cuvi cachi yo nu mesa Nyoo. Ta suri cuhva cuan cachi yo nu mesa ra ña vaha. ²²Ma cuhva yo tisihi chi Nyoo vatyí maa ra iyó ca fuerza chi ra ta ñima ca maa yo.

Sacuvi yo ñáa cha sacuvi yo, soco cha cuenda cha vaha chi tahan yo

²³Catyí chi tuhun: “Cuví sacuvi yo ñáa cha cuñi yo. Soco ña tandihí

ta cuví chi cha vaha chi yo.” Ta ndicha cuví sacuví yo cha cuñí yo. Soco ña tandíhi ta tyinyeé chi chi yo cha cuahnu yo chihin tuhun Nyoo. ²⁴Ma nanducu yo cha vaha chi maa ri maa yo, soco na nducu tucu yo cha vaha chi inga ñu.

²⁵Cachi ndo ñáá coño cha xicó ñu nuyahvi. Ta ma ndaca tuhun ndo ta ma ndichi xiñi ndo yóó chi cuenda cuví. ²⁶Vatyí ñuhu ñáyivi ta tandíhi cha iyó nuu chi, chi maa Nyoo cuví.

²⁷O tatu noo ñu ña chinó iñi chi Nyoo, catyí ñu chi ndo cha cucachi ndo vehe ñu, ta tatu cuñí ndo cuhun ndo, cūhun ndo ta cachi ndo tandíhi cha chahá ñu cachi ndo. Ta ma ndaca tuhun ndo ñáá cuenda cuví. ²⁸Soco tatu nya noo ñu catyí ñu chi ndo: “Nyayu ihya nyayu cha chahá cuenda ñu chi xitohyo cuví”, catyí ñu. Ma cachi ca ndo tacuhva cha ma nducuihya cuñi añima ñu cha catyí chi ndo tyicuan caa. ²⁹Cahín tuhun ihya cuenda inga ñu ta ñima cuenda maa ndo.

Soco yihí ndo catyí ndo: “¿Ñáá tuhun cha sahá xaan ra ihya cuenda chi yuhu cha catyí inga ñáyivi? ³⁰Tatu nacuhvé tyahvi nyoo chi Nyoo cuhva cha cuacachi, ñáá tuhun catyí inga ra cuan tyí ña vaha cachí”, catyí ndo. ³¹Cuacatyí chi ndo tyehe caa, tatu chachí ndo, o chihí ndo, o sacuví ndo ñáá ca cha sacuví ndo, sacuví ndo soco chi maa Nyoo sacahnu ndo chihin cha sacuví ndo. ³²Ta ma cuhva ndo cuhva cha canacavá noo tahan ndo, ni ra Israel, ni ñáyivi cha ñima ñu Israel cuví, ni ñu yihí cuenda Nyoo. ³³Tari yuhu, nanduquí cha vaha cuví chi ñáyivi. Ña nanduquí

cha vaha chi mai, soco cha vaha chi inga ñáyivi nanduquí. Vatyí tacuhva cacu añima ñu.

11 Cuñí vatyí cunyicon ndo cuhva nyacuví. Tari mai nyiquén cuhva nyacuví ra Cristo.

Yoso caa coo ñusihi nu ndu iñ ri yo

²Yañi, sii xaan cuñí vatyí tyicuan ri nicohón iñi ndo chii. Ta quichahá ndo cha sañahí chi ndo. ³Soco cuñí tyi coto ndo vatyí ra Cristo cuví xiñi noo noo rayii, ta rayii cuví xiñi ñasihi ra, tari Nyoo cuví ra xiñi ra Cristo. ⁴Tatu noo rayii, nyasí xiñi ra ta chicán tahvi ra o cahán ra tuhun cha chahá Nyoo chi ra, ticahan nuu chahá ra chi ra cuví xiñi ra. ⁵Soco tatu noo ñaha sihi ña chasí ña xiñi ña cuhva cha chicán tahvi ña, o cuhva cha cahán ña tuhun cha chahá Nyoo chi ña, tari cha satya ndii xiñi ña cuví cuan. Ta ticahan nuu chahá ña chi ra cuví xiñi ña. ⁶Tatu noo ñaha sihi ña chasí ña xiñi ña, vaha taxin ca nacahnya ña tandíhi ixi xiñi ña. O tatu cahán nuu ña cha satyá ndii ixi xiñi ña, nacasi ña xiñi ña. ⁷Ña tahán chi casi rayii xiñi ra. Vatyí cuhva caá Nyoo caa ra, vatyí nyacá ñaha ra chi ñasihi ra, tari nyacá ñaha Nyoo chi ra. Soco noo ñaha sihi chahá ña cha cunyaca ñaha yii ña chi ña. ⁸Vatyí quivi savahá Nyoo chi rayii, ña savahá ra chi ra chihin yiqui naha ñaha sihi. Soco chihin yiqui naha rayii savahá Nyoo chi ñaha sihi. ⁹Ta cha catyí rayii, ta chingo ñaha sihi. ¹⁰Yucuan chaha ñusihi cuñí chi cunyasi xiñi ñu. Vatyí ican cuan cuví noo seña vatyí nyacá ñaha yii ñu chi ñu. Ta cha cuenda

cha vaha chi ángel cuví. ¹¹Soco tyaa maa Nyoo cuhva vatyí chiñuhú rayíi chi ñusihi. Ta chiñuhú ñusihi chi rayíi. ¹²Vatyí ndicha ñaha sihi chinqo ña chihin yiqui naha rayíi, tari quívi cha sacacu ra chi ña cuví cuan. Soco nya cua nya quívi cuan ta maa ña quichaha sacacu ña chi rayíi. Ta nya cua nya vityin ñusihi ta rayíi maa Nyoo chahá cha coo ni nduvi tahan ñu.

¹³Nyehe maa ndo. ¿Atu vaha quetuví cha ña nyasí xiñi ñusihi ta chicán tahvi ñu chichi vehe ñuhu? ¹⁴Vatyí cha chitó ndo vatyí ticahan nuu cuvi chi rayíi tatu nañi xiñi ra. ¹⁵Soco ñusihi, vaha cha cunañi xiñi ñu vatyí Nyoo chahá ra ixi nañi chi ñu vatyí casi chi xiñi ñu. ¹⁶Soco tatu yóo cha cuñi cuví yuhu cha catyí tuhun ihya, cuñi chi coto ndo vatyí ni nyuhu ta ni vehe ñuhu Nyoo, ñahri inga costumbre iyó chi ndi.

Nu sañahá ra Pablo chi ñu vatyí ña vaha cuhva chachí ñu Santa Cena

¹⁷Yañi, nonga tuhun cuacatyí chi ndo. Vatyí ña sii cuñi chihin ndo, vatyí ndu ín ri ndo, soco ña chahá chi cha vaha chi ndo. Ta sativí chi chi ndo. ¹⁸Ta cuaha xaan ñáyivi nacatyí chii vatyí cuhva cha ndu ín ri ndo cha cuacoo culto, iyó ndo cha tavá siin ndo chi ndo. Ta suhva ri chinó iñi, ta suhva ña chinó tucu iñi. Soco vasi ndicha. ¹⁹Vasi cuñi chi coo tisihi nu nyicú ndo tacuhva coto yo nya ndo ndicha cha yihí cuenda Nyoo. ²⁰Soco tatu tyicuan caa iyó tisihi nu nyicú ndo, ñima Santa Cena chachí ndo cuví cuan. ²¹Vatyí cuhva cha cuacachi ndo,

chachí ri ndo cha nyisó ndo. Ta ña nyatú ndo nya ndu ín ri tahan ndo. Ta yihí ndo cuaha chachí ndo. Ta chiñi ndo chihin vinu. Ta yihí ndo ña ñihí ndihi ndo cha cachi ndo. ²²¿Atu ñahri vehe ndo cachi ndo ta coho ndo? Vatyí cha nyacuví ndo tyehe caa, ña cuñi nyehé ndo vehe ñuhu Nyoo cuví cuan. Ta chahá ndo ticahán nuu chi ñu ñahri maa iyó chi. ¿Atu tahán chi catyí chi ndo vatyí vaha cuhva nyacuví ndo, cuñi maa ndo? Ña tahán chi tyi ñahri noo cha cachi caa nyacuví ndo.

Ra Pablo chahá ra tuhun chi ñu, ñáá tuhun quehén ñu Santa Cena

(Mt. 26.26-29; Mr. 14.22-25; Lc. 22.14-20)

²³Vatyí yuhu suri maa Sutu Mañi yo sañaha tuhun ihya chii. Ta suri maa tuhun ihya sañahi chi ndo. Cha cuaa cha ni cumañi ca cuhva cuenda ra Judas chi Sutu Mañi yo chi ra xaan iñi chi ra, ra Jesús quehen ra noo pan. ²⁴Ta cha yaha nacuhva ra tyahvi nyoo chi Nyoo ta tahvi sava ra. Ta catyí ra: “Cachi ndo. Vatyí tari coño ñuhi cuví pan ihya. Ta cha catyí ndo ta cucúvi yuhu. Sacuvi ndo tyehe caa vatyí nicohon iñi ndo chii”, catyí ra Jesús. ²⁵Ta cha yaha cha cacuxiñi ra ta quehen ra Jesús copa ta catyí ra: “Chihin copa vinu ihya natyihí tahan Nyoo tuhun chaa chihin ndo vityin. Vatyí vinu cha yihí chichi copa ihya, ñiñi cuvi. Tahan ri cuacoho ndo, coho ndo cha cuenda cha nicohón iñi ndo chii”, catyí ra Jesús cha cuaa cuan. ²⁶Ta tahan ri cha ndu ín ri yo ta chachí yo pan ta chihí yo vinu sacotó yo chi ñáyivi vatyí cha catyí cuatyí yo

chihí Sutu Mañi yo. Ta tyicuan caa sacotó yo chi ñáyivi nyacua nya quívi quichi tucu ra.

Ra Pablo chahá ra tuhun chi yo yoso caa saccoó yo Santa Cena

²⁷Tatu chachí yo pan ta chihí yo vinu noo cuhvá cha ña chitahán iñi Nyoo, chicoó cuatyí yo. Vatyí ña sahá yo ñáyivi coño ñuhu ta niñi ra Cristo. ²⁸Yucuan chaha cuñí chi sahá yo cuenda tatu vaha cuahán yo chihin Nyoo cha ni ri ca cha cumañi cachi yo pan ta coho yo vinu. ²⁹Vatyí tatu chachí yo ta chihí yo chihin cha ña sahá yo cuenda ñáá tuhun chihi ra Cristo, Nyoo cutachi tuñi ra chi yo. ³⁰Yucuan chaha cuaha xaan nyoho cuhví ndo, ta ñahri vaha fuerza ndo. Ta yihí ndo cha chihí ndo. ³¹Soco tatu sahá vaha yo cuenda chi yo, Sutu Mañi yo ma tachi tuñi ra chi yo. ³²Soco tatu Sutu Mañi yo ta tachi tuñi ra chi yo tyicuan caa, vatyí tacuhva ma cunaa yo chihin ñáyivi iyó siqui ñuhu ñayivi ihya. ³³Ta tyicuan caa nyoho yañi, tatu cuandu iin ri ndo cha cuacoo Santa Cena, cuatu ndo chi noo noo tahan ndo ta cachi ndo ta coho ndo iin ri. ³⁴Soco tatu nya noo nyoho chisocó ndo, cachi ndo nya vehe ndo tacuhva cha ma tachi tuñi Nyoo chi ndo.

Ta inga tuhun cusandaa mai quívi cha quichi nyehi nu nyicu ndo.

Cha vaha cha chahá Tatyí Ii Nyoo chi yo

12 Yañi, cuñí vatyí coto ndo ñáá ndihí cha vaha cha chahá Tatyí Ii Nyoo chi noo noo yo.

²Chitó ndo vatyí quívi cha ña ñohó nuu ndo chi Nyoo, chahá ndo chi ndo cha cunyaca ñaha xitohyo cha ña cuví cahan. ³Yucuan chaha cuñí tyi coto ndo vatyí tatu noo ra catyí tyi ña vaha ra Jesús, ñima Tatyí Ii Nyoo yihí chi ra. Soco tatu noo ra cha catyí tyi ra Cristo cuví Sutu Mañi yo, Tatyí Ii Nyoo yihí chi ra.

⁴Siin siin cha vaha naquehén noo noo yo, soco maa Tatyí Ii Nyoo ican chahá. ⁵Siin siin cuhva sahá tyiño yo soco tyiño nuu noo ri maa Sutu Mañi yo sacuví yo. ⁶Siin siin tunyee iñi chahá ra chi noo noo yo. Soco noo ri maa Nyoo cuví ra chotyíño chi tandihí yo. ⁷Chi noo noo yo chahá ra tunyee iñi Tatyí Ii ra, tacuhva tyi tyinyeé yo chi tandihí ñu yihí cuenda ra. ⁸Chi suhva ñu chahá Tatyí Ii Nyoo vatyí cahán ñu chihin cha chiñi tuñi maa ra. Ta chi inga ñu chahá ra cha nacoto ñu ta cahan ñu tuhun cha sacotó Nyoo chi ñu. ⁹Ta chi inga ñu chahá ra cha chinó vavaha iñi ñu chi ra. Ta suri maa Tatyí Ii ra chahá ra tunyee iñi chi inga ñu vatyí cuví sanduvaha ñu chi ñu cuhví. ¹⁰Ta chi inga ñu chahá ra tunyee iñi vatyí cuví sacuvi ñu milagru. Ta inga ñu chahá cuenda ñu tuhun cahán Nyoo. Ta chi inga ñu chahá ra vatyí cuví cohon nuu ñu Tatyí Ii Nyoo ta tatyí ña vaha. Ta chi inga ñu chahá ra tunyee iñi ra vatyí cuví cahan ñu inga sahan cha ña chitó ñu. Ta chi inga ñu chahá ra tunyee iñi vatyí cuví nacoto ñu ta nacatyí ñu inga sahan cha cahán tahan ñu. ¹¹Soco tandihí tuhun ihya, noo ri maa Tatyí Ii Nyoo chahá. Soco siin

siin cuhva chahá ra chi noo noo yo, yoso cuhva cuñí maa ra.

Chichi cha tandihi yo ta nduví yo noo ri coño ñuhu ra Cristo

¹²Ra Cristo cuví ra tari noo coño ñuhu. Vatyí cuaha cha nyaá chi coño ñuhu. Nyaá xiñi. Nyaá ndaha. Nyaá chaha. Ta chichi cha tandihi cuan nanduví chi noo ri coño ñuhu. ¹³Ta tyicuan caa tucu tandihi yo, an cuví yo ñu Israel, o ñu Grecia, o ñu iyó chitoho, o ñu yori chitoho, condutya yo vatyí cuví yo noo ri coño ñuhu cuenda ra Cristo. Vatyí noo ri maa Tatyí li ra chahá ra tyi quihí chi tandihi yo.

¹⁴Noo coño ñuhu cuaha xaan cuenda yihí tahan. Ñima minoo ri cuenda. ¹⁵Tyehe ta cuví cahan chaha yo ta catyí chi: “Yuhu ñima coño ñuhu cuví vatyí ñima ndaha cuví.” Ñima vatyí catyí chi tyicuan caa ta ñima coño ñuhu cuví chi. ¹⁶O tyehe ta cuví cahan soho yo ta catyí chi: “Yuhu ñima coño ñuhu cuví vatyí ñima chiti nuu cuví.” Ñima tyi catyí chi tyicuan caa ta cusandihí chi cha cuví chi coño ñuhu. ¹⁷Tyehe ta tandihi coño ñuhu yo cuví chiti nuu yo, yoso caa cuví cuiñi yo. O tyehe ta tandihi coño ñuhu yo cuví soho yo, yoso caa cuví tahñi yo. ¹⁸Soco Nyoo tyaá ra noo noo cuan nu cuñí maa ra. ¹⁹Tatu iin cahnu ri caa coño ñuhu yo, ñima coño ñuhu cuví. Ta ña vaha quetuví. ²⁰Soco vasi cuaha cha nyaá chi yo, vaha quetuví vatyí nyaá tandihi cha cuví coño ñuhu chi yo.

²¹Tyehe ta cuví cahan chiti nuu yo, ñahri ityi iyó chi chi cha catyí chi chi ndaha yo: “Ña chiñuhú yoho

chii.” Ta ni xiñi yo ta ñahri ityi iyó chi chi cha catyí chi chi chaha yo: “Ña chiñuhú yoho chii.” ²²Ña vaha cha catyí chi tyicuan caa. Vatyí vasi luhlu ri noo coño ñuhu yo cha cuñí maa yo tyi ña chiñuhú chi yo, ican cuan cuví cha chiñuhú ca chi yo. ²³Ta nu cuñí vaha yo, ican cuan sacuihnó vaha ca yo. Ta nu cuñí maa yo tyi ña tyaqui, ican cuan sacuví ca yo. ²⁴Ta nu tyaqui ca, ña cuñí chi sacuvii yo. Soco maa Nyoo sandu iin ri ra coño ñuhu yo, tacuhva vatyí nu cuñí maa yo tyi ña tyaqui, sacahnú ca yo. ²⁵Tacuhva cha ma cusii coño ñuhu, tahan tahan chi cuñí chi quihí iñi chi cha catyí inga tahan chi. ²⁶Tatu suhva coño ñuhu yo nyehé chi tindoho, tandihi ri chi nyehé, ñima noo ri chi. Ta tatu suhva chi cusii cuñi chi, tandihi ri chi ta cusii cuñi chi, ñima noo ri chi.

²⁷Ta maa yo cuví yo coño ñuhu ra Cristo. Ta suhva suhva coño ñuhu ra cuví noo noo yo. ²⁸Ta Nyoo cuatyaa ra chi noo noo yo vehe ñuhu tacuhva tyinyeé yo chi tahan yo. Cha xihna ca cuatyaa ra chi ra apóstol. Cha cu uvi, chi ra profeta, o ra cachahá cuenda tuhun cahán Nyoo cuví cuan. Ta cha cu uñi, chi ra casañahá. Ta yaha cuan, ra cha casacuví milagru, ta ra cha casanduvahá chi ñu cuhví, ta ra cha catyinyeé chi ñáyivi, ta ra casahacuendá vehe ñuhu, ta ra cha cacahán inga sahan cha ña chitó ra. ²⁹Ña tandihi yo cuví yo apóstol. Ña tandihi yo cuví yo noo profeta. Ña tandihi yo cuví yo ra sañaha. Ña tandihi yo sacuví yo milagru. ³⁰Ña tandihi yo chahá

Nyoo vatyí sanduvahá yo ñu cuhví. Ña tandihí yo cahán yo inga sahan cha ña chitó yo. Ña tandihí yo cuví nacoto yo ta nacatyí yo ñáá cha cuñí chi catyí noo cha cahán yo chihin inga sahan. ³¹Ta ndücu ndo cuhva naquehen ndo cha vaha ca cha chahá Nyoo. Soco cuasañahi noo ityi cha vaha ca chi ndo.

Chahá ra Pablo tuhun chi yo yoso caa tahán chi cha cuñí yo chi ñáyivi

13 Tatu yuhu ta cuví cahin cuaha ri nuu sahan iyó siqui ñuhu ñayivi ihya, ta cuví cahan tiqui sahan ángel ñandihí, soco tatu ñahri cha cuñí chi Nyoo ta chi ñáyivi, cuví tari noo tambu cha ñáí ri maa o noo caa cha chacú ndaxin ri maa. ²Tatu cuví cuhva cuende tuhun cahan Nyoo, o tatu cutuñí iñi tandihí tuhun xehe ca, ta chité tandihí, ta ña cuñí chi Nyoo ta chi ñáyivi, ñahri maa tuhun. Tatu chinó vavaha iñi chi Nyoo nyacua cuví catyi chi ra na tohon ra noo yucu cuan ta natyaa ra inga ityi, ta sacuví ra cha chiquén, soco tatu ña cuñí chi Nyoo ta chi ñáyivi, ñahri ra cuví. ³O tatu cuhve tandihí cha iyó chii chi ñu ndahvi, ta nyacua cuhva cuende ñayivi tyi cayu coño ñuhi, soco tatu ña cuñí chi Nyoo ta chi ñáyivi, ñahri maa tuhun.

⁴Tatu cuñí yo chi Nyoo ta chi ñáyivi, ña ihñi tisihi yo. Vaha ñáyivi cuví yo. Ña nyiyó iñi yo cha chahá Nyoo chi inga ñu, ña cahnu sahá yo chi yo, ta ña yaá yo. ⁵Tatu cuñí yo chi Nyoo ta chi ñáyivi, ña quiñi iyó yo. Ña nanducú yo maa ri cha vaha chi maa yo. Ña

cuxaán yo. Ña ndoó tisihi añima yo. ⁶Tatu cuñí yo chi Nyoo ta chi ñáyivi, ña cusii cuñí yo ñáá ndihí cha ña vaha sacuví ñáyivi. Soco cusii cuñi yo cuenda cha vaha ta cha ndicha. ⁷Tatu cuñí yo chi Nyoo ta chi ñáyivi, cunyeé yo nyehe yo tindoho sahá ñáyivi. Chinó iñi yo tyi cusacuvi ñu cha vaha. Nyatú yo cha nasama ñu cuhva iyó ñu. Chihin cha cama iñi yo ta cunyeé yo tandihí.

⁸Cha cuñí yo chi Nyoo ta chi ñáyivi ma ndihí maa, soco coo quivi cha ma coo ca tuhun cha sahá yo profetizar. Ta ma cahan ca yo inga sahan cha ña chitó yo, ta tandihí tuhun cha chitó xaan yo cundihi. ⁹Vityin chiin ri chitó yo ta chiin ri sahá yo profetizar. ¹⁰Soco quivi quichi ra Cristo, cunduvaha tandihí ta cucoto yo tandihí, ta cundihi tuhun cha chitó yo chiin ri.

¹¹Quivi cu luhlí cahin ta chica xiñi tari ra cuatyaa. Soco quivi chahní sandoi cha nyacuvi tari ra cuatyaa. ¹²Ta tyicuan caa tucu, cuví yo tari ra cuatyaa vityin. Tari cha nyehé yo nu ino cha ña ndichin vaha. Soco quivi quichi ra Cristo ta cunyehe vaha yo chihin nuu yo chi ra. Chiin ri chitó yo cha vityin. Soco quivi cuan tandihí cuii ta cucoto yo, tari ñohó nuu Nyoo chi yo. ¹³Iyó uñi tahan cha ma ndihí maa: cha chinó iñi yo chi Nyoo, cha cuatu yo cha ñihí yo cha cuenda ra Cristo, ta cha cuñí yo chi Nyoo ta chi ñáyivi. Soco chichi cha ninduñi tahan cuan, cha chiñuhú ca chi yo, cha cuñí yo chi Nyoo ta chi ñáyivi.

Nu sañahá ra Pablo yoso caa cahán yo inga sahan cha ña chitó yo

14 Na sañihi yo cuñí yo chi Nyoo ta chi ñáyivi. Ta

na nducu yo cuhva naquehen yo tunyee iñi cha chahá Tatyí li Nyoo chi yo. Na nducu xihna yo cha cuhva cuenda yo tuhun cahán Nyoo, o sahá yo profetizar cuví cuan. ²Vatyí tatu cahán yo inga sahan cha ña chitó yo, cahán yo soco chihin Nyoo. Ñima chihin ñáyivi. Vatyí ni noo ñu ta ña cutuñí iñi ñu. Vatyí tuhun xehe cuví tuhun cha cahán yo cha cuenda Tatyí li Nyoo. ³Soco tatu sahá yo profetizar, cutuñí iñi ñu. Ta chahnu ca ñu chihin tuhun Nyoo. Ta tyicuan caa sanduní yo ta sandunyeé ca yo iñi ñáyivi. ⁴Tatu cahán yo inga sahan cha ña chitó yo, maa ri maa yo ndunyeé yo. Soco tatu sahá yo profetizar, ndunyeé cuñi tandíhi ñu yihí cuenda Nyoo.

⁵Yuhu cuñí vatyí tandíhi ndo cahán ndo inga sahan cha ña chitó ndo. Soco vaha ca cha saha ndo profetizar. Vatyí tyinyeé ca chi chi ñu nyicú vehe ñuhu ta ñima ca cha cahán yo inga sahan. Soco tatu noo ndo cuví nacoto ndo ñáá tuhun cahán noo tahan ndo chihin inga sahan, nacatyí ndo. Tyicuan ta cuví tyinyee chi chi tandíhi ndo. ⁶Yucuan chaha yañi, tatu yuhu ta chai nu nyicu ndo, ta cahín inga sahan, ña tyinyeé chi chi ndo. Soco tatu cahín noo cha sanyehé Nyoo chii, o noo cha sacotó ra chii, o noo profesia, o noo cha sañahi chi ndo, tyinyeé chi chi tandíhi cuí maa ndo.

⁷Tatu tiví yo noo cutu, o sacuacu yo noo guitarra ta ña quita vaha ndusu cuan sahá yo, ma coto yo ñáá yaa cuví. ⁸Ta tatu nu iyó cuatyí ta ña tyacú vaha trompeta, yori

coto ñáá cuhva tahán chi cañi tahan ra. ⁹Ta tyicuan caa yoó, tatu cahán yo inga sahan cha ña cutuñí iñi ñáyivi, ma coto ñu ñáá tuhun cahán yo. Tari cha cuví yuhu ri maa yo cuví cuan. ¹⁰Cuaha xaan nuu sahan iyó ñayivi ihya. Ta noo noo nuu sahan ta iyó iyó ri cha cuñí chi catyí. ¹¹Soco tatu ña cutuñí iñi sahan cha cahán inga ñáyivi chihin, ma cuvi ndatuhin chihin ñu. Ta ni ri maa ñu ma cuvi ndatuhun ñu chihin yuhu. Cuví ñu tari ñu inga ñuu cha cuende. ¹²Yucuan chaha nyoho cha cuñí xaan ndo naquehén ndo tunyee iñi cha chahá Tatyí li Nyoo, nducu ndo noo tunyee iñi cha vaha ca cutyinyee chi ñáyivi vehe ñuhu.

¹³Yucuan chaha nyoho cha cahán ndo inga sahan, çacan ndo chi Nyoo vatyí cuvi nacoto ndo ta nacatyí ndo chi tahan ndo. ¹⁴Vatyí tatu nacuatí chi Nyoo chihin noo sahan cha ña cutuñi iñi, espíritu mai cha yihí chichi coño ñuhi ican nacuatú soco cha chiñi tuñi xiñi ña cutuñí iñi chi. ¹⁵Yucuan chaha cuñí chi çacan tahvi chi Nyoo chihin inga sahan. Soco cuñí tucu chi cha çacan tahvi chi ra chihin sahan cha cutuñí iñi. Ta cuñí tucu chi cha cate chihin sahan cha ña cutuñí iñi, Soco cuñí tucu chi cha cate chihin sahan cha cutuñí iñi yo ñandíhi. ¹⁶Vatyí tatu maa maa ri chihin sahan cha chahá Tatyí li Nyoo chuun, sacahnún chi ra, ma cutuñi iñi ñáyivi cha ña chitó ñáá cha cuví cuan. Ta ma cuvi sacahnu ñu Nyoo chuhun. ¹⁷Vasi vaha tuhun cahún, cuhva cha nacuhvón tyahvi nyoo chi Nyoo tyicuan caa, soco ña

tyinyeé chi chi inga ñáyivi vatyi ña cutuñí iñi ñu tuhun cahún. ¹⁸Soco yuhu nacuhvé tyahvi nyoo chi Nyoo vatyi cuaha ca chaha cahin inga sahan ta ñima ca tandihi nyoho.

¹⁹Soco chichi vehe ñuhu tahan ca iñi cahín vasi ohon tahan tuhun cha cutuñi iñi ndo vatyi sañahi chi inga ndo, ta ñima ca cha cahín uchi mil tuhun cha ña cutuñí iñi ndo.

²⁰Chahnu cuhva caca xiñi ndo, yañi. Ta ma lee xaan cuhva caca xiñi ndo. Soco lee cuhva cunyacuvi ndo. Vatyi cha lee ña nyacuví chi cha quiñi caa. ²¹Catyí Nyoo nu libru ley ra tyehe caa: “Cucahin chihin ñáyivi ihya chihin yuhu ñáyivi inga ñuu ta chihin inga sahan. Cha ña cutuñí iñi ñu. Soco ni ri tyicuan caa ta ma quichaha ñu chii”, catyí Sutu Mañi yo. ²²Yucuan chaha tuhun cha cahán yo inga sahan cuví chi tari noo seña chi ñu cha ña chino iñi tuhun ra Cristo. Soco tuhun cha sahá yo profetizar, cuví chi cuenda ñu cha chinó iñi chi ra. ²³Vatyi tatu ndu iñ ri ndo, ta tandihi ndo cahán ndo inga sahan ta quihví noo ñu cha ña yihí cuenda Nyoo, cucatyí ñu tyi ña vaha cuñí xiñi ndo. ²⁴Soco tatu tandihi ndo sahá ndo profetizar, ta quihví noo ñu cha ña yihí cuenda Nyoo, o noo ñu ña cutuñí vaha iñi tuhun Nyoo, coto ñu tyi iyó cuatyí ñu cha cuenda tyi cutuñí iñi ñu cha cahán ndo. ²⁵Ta tandihi cha caa chichi añima ñu cunacoto ñu. Ta nicuiñi chiti ñu ta sacahnu ñu chi Nyoo. Ta catyi ñu vatyi ndicha ndicha cuii cha nyaá Nyoo chihin ndo.

Yoso caa sacóo yo culto minoo cha cachi minoo cha ndaa

²⁶Yucuan chaha yañi, tatu cuandu iin ri yo, cuiiso noo noo yo yaa cha cata yo, o cha sañaha yo, o ñáá cha sanyehe o sacoto Nyoo chi yo, o cahan yo inga sahan, o cha nacoto yo ta nacatyí yo yoso caa cuahán tuhun inga sahan cuan. Soco tandihi ihya nacuvi chi noo cha chahá tunyee iñi maa Nyoo chi tandihi yo cha yihí yo cuenda ra. ²⁷Tatu cuacahan yo inga sahan nu ndu iñ ri yo, cuñí chi cahan uvi yo o uñi ri yo, soco noo noo ri yo cahan. Ma cahan yo iin ri. Ta siin ri cuñí chi cha nacatyí noo yo tuhun cahán tahan yo. ²⁸Soco tatu yori cuví nacatyí ñáá tuhun cahán yo, vaha taxin ca ma cahan ca yo chihin inga sahan nu ndu iñ ri yo. Cahan yo inga sahan soco xehe ri chihin Nyoo tacuhva cuiñi ri maa yo. ²⁹Tyicuan caa tucu tatu sahá yo profetizar, cahan uvi yo, o uñi ri yo. Ta tandihi ca yo saha yo cuenda tatu vaha cha cahán tahan yo. ³⁰Soco tatu sacoto Nyoo ñáá noo ca tuhun chi inga ñu cha canyicú chiñi tuhun cuan. Tyicuan ta ñu cha xihna ri, cuñí chi sandihi ñu cha cahán ñu tacuhva cuvi cahan inga ñu cuan. ³¹Ta tyicuan caa tandihi ndo cha naquehén ndo tuhun cha chahá Nyoo chi ndo cuví nacatyí noo noo ndo. Vatyi tacuhva cutuhva tandihi ca ndo ta cunii ca iñi ndo. ³²Ñu cha sahá profetizar cuví cuatu noo ñu nya ndihi cahán inga ñu. Vatyi noo ri Nyoo cuví ra cha nyacá ñaha chi noo noo yo.

³³Vatyi Nyoo cachi iyó ra ta ña iñi ndaa iñi noo nyacuví ra.

Quehen ndo cuhva vaha nyacuví inga hermano nu ca ndu iñ ri ra.

³⁴Nusihi taxi ri na coo ñu. Cuñi chi quichaha ñu chi yii ñu tari catyí ley Nyoo. ³⁵Tatu ñáá cha cuñi ñu coto ñu, na ndaca tuhun ñu chi yii ñu nya vehe ñu. Vatyi ña vaha quetuví cha cahán ñusihi nu ndu iñ ri yo.

³⁶Tatu siin cuhva chicá xiñi ndo, cuñi chi nicohón iñi ndo vatyi ñima chihin ndo quichaha tuhun Nyoo. Ta ñima nyoho ri naquehén tuhun Nyoo. ³⁷Tatu nya noo ndo cuñi maa ndo vatyi profeta cuví ndo, o tatu cuñi maa ndo tyi Vatyi li saquehén ityi ra chi ndo, cunacoto ndo vatyi cha catyí chi ndo ihya, mandamiento Sutu Mañi yo cuví.

³⁸Soco tatu ña cuñi ndo naquehén ndo tuhun ihya, ni nyuhu ta ma naquehen ndi tuhun cahán ndo.

³⁹Ta tyicuan caa yañi, na nducu ndo cuhva saha ndo profetizar. Ta ma casi ndo cha cahán ñu inga sahan. ⁴⁰Soco sacuvi ndo tandihi chihin cha ndaa ta chihin cha cachi.

Yoso caa nandoto ra Cristo

15 Vityin yañi, cuñi vatyi nicohon iñi ndo tuhun ra Cristo, cha sacacú chi yo, cha cahin nuu ndo quivi cuan. Ta ican naquehen ndo ta ñii iñi ndo chinó iñi ndo. ²Ta suri cha cuenda tuhun ra Cristo cacú ñanima ndo tatu cuahán ndo tari cuhva sañahí chi ndo. Soco tatu natyihí caxiin ndo cuahan ndo, ñahri maa tuhun cha chinó iñi ndo chi Nyoo.

³Cha xihna ri sacote tuhun cha cutuhve chi ndo. Ta sañahí chi ndo

vatyi ra Cristo chihí ra cha catyi cuatyi yo, tari catyí nu libru Nyoo vatyi cucuvi. ⁴Tyicuan ta chicuchi ñu chi ra. Soco nu ndu uñi quivi nandoto ra tari catyí tucu nu libru Nyoo. ⁵Tyicuan ta tuví ra Cristo nuu ra Pedro ta yaha cuan ta nuu ndi uchi uvi tahan ra chicá tyiño ra. ⁶Yaha cuan ta noo chaha tuví ra nuu yaha ca ohon cientu yañi yo. Ta cuaha ca ñu cuan iyó ca ñu vityin. Soco suhva ñu cha yaha chihí ñu. ⁷Yaha cuan ta tuví ra nuu ra Jacobo. Yaha cuan ta nuu tandihi ra apóstol.

⁸Ta nu ndihi tuví tucu ra nuu yuhu, cha cuví tari noo ra cuatyaa cha cacu ta ta chaa ca yoo cacu. (Vatyi ta cutuñi ca iñi tuhun Nyoo cuví cuan.) ⁹Vatyi cha nuu tandihi ca ra apóstol cuví yuhu noo cha ñima ri tuhun. Ta ni ña nañé cha cuví apóstol vatyi chicá nyicon xain chi ñu ñohó cuenda Nyoo. ¹⁰Soco Nyoo vaha xaan ñáyivi cuví ra chihin. Ta ñima cha caha ri saha ra tumañi iñi chii cha cuví noo ra chicá tyiño ra. Ta ñihi ca sahá tyiñe ican saha inga ra. Soco ñima mai sahá tyiñe vatyi maa Nyoo nyaá chihin. Ta ican ra sacuví tandihi cuan. ¹¹Soco ñahri saha, an yuhu, an inga ra cuan. Soco tuhun cahán ndi chihin ndo, ican ihya cuvi tuhun cha chinó iñi ndo.

Nu sañahá ra Pablo vatyi cha ndicha cuví vatyi cunandoto ñu ndiyi

¹²Tatu cahán ndi tuhun cha nandoto ra Cristo mahñu ñu ndiyi chihin ndo, ¿ñáá tuhun cha yihí ndo catyí ndo vatyi ma nandoto ñu ndiyi? ¹³Vatyi tatu ma nandoto ñu

ndiyi, ni ri ra Cristo ta ña nandoto ra cuví cuan. ¹⁴Tyehe ta ña nandoto ra Cristo, tuhun cha cahán ndi chihin ndo ñahri maa vale. Ta ni ri cha chinó ñni ndo, ñahri maa tuhun. ¹⁵Tatu tyehe ta ña ndicha cha sanandoto Nyoo chi ra Cristo, cuví ndi noo ra cuendu tyi catyí ndi vatyí sanandoto Nyoo chi ra. Ta tatu ña ndicha cha nandoto ñu ndiyi, ña ndicha cha sanandoto Nyoo chi ra Cristo. ¹⁶Vatyí tyehe ta ma nandoto ñu ndiyi, ni ri ra Cristo ta ña nandoto ra. ¹⁷Ta tatu ña nandoto ra Cristo, ñahri maa tuhun cha chinó ñni ndo cha sandachí ra cuatyí ndo. Ta tacuhva iyó ri maa cuatyí ndo. ¹⁸Ta ñu yihí cuenda ra ta cachihí ñu, cuanaa ri maa ñu cuví cuan. ¹⁹O tyehe ta ihya ri ñayiví tyinyeé ra Cristo chi yo, ta ma nandoto yo quivi quichi ra, cuví yo noo ñu tondo cha nuu tandihí ca ñáyivi.

²⁰Soco chitó vaha yo vatyí cha ndicha cuví cha nandoto ra Cristo. Ta ican ra cuví cha nandoto xihna ca mahñu ñu ndiyi. ²¹Vatyí cha catyí cuatyí ra Adán ta chicoó tuhun chihi. Yucuan chaha tahán chi cúvi yo. Soco cha catyí cha nandoto ra Cristo tahán chi nandoto tucu ñu yihí cuenda ra. ²²Ta tari tandihí ñáyivi chihí cha cuenda ra Adán, tyicuan caa tucu cunandoto tandihí ñu cuenda ra Cristo. ²³Soco noo noo yo cunandoto yo quivi tahan chi chi yo. Xihna ca ra Cristo nandoto. Yaha cuan ta quivi quichi tucu ra inga chaha cunandoto tucu ñu yihí cuenda ra. ²⁴Yaha cuan ta cundihí tuhun ñuhu ñayiví ihya ta

ma cunyaca ñaha ca ra cuví tyiño nahnu, ta tatyí ña vaha. Vatyí ra Cristo cuatinyaa ra fuerza chi ra cuan. Ta cunacuhva cuenda ra chi Nyoo Sutu ra. ²⁵Vatyí ra Cristo cunyaca ñaha ra nyacua nya quivi cuhva Nyoo cha cuvi chasaha ra chi tandihí ra xaan ñni chi ra. ²⁶Ta nya nu ndihí, cusanaa ra tuhun chihi. ²⁷Vatyí cha yahá nacuhvā cuenda Nyoo tandihí chi ra Cristo vatyí cunyaca ñaha ra. Soco nu catyí chi vatyí tandihí natyaa Nyoo ndaha ra, cuñí chi catyí vatyí ma cunyaca ñaha ra chi maa Nyoo vatyí ican maa Nyoo natyaa tandihí cuan ndaha ra. ²⁸Soco quivi saha ganaa ra Cristo tandihí, tyicuan ta maa ra cha cuví ra Sehe Nyoo, cunacuhva cuenda ra tandihí chi Nyoo Sutu ra. Vatyí Nyoo cucuvi ra Nyoo cuenda tandihí maa cha iyó.

²⁹Tatu tyehe ta ña nandoto ñu chihí, ¿ñáá tuhun yihí ñu condutyá ñu tyiño nuu ñu chihí?

³⁰Ta tyicuan caa tucu mai, tatu ma nandote, ¿ñáá tuhun ndoí vaha cha ndi quivi nyatí tuhun chihi?

³¹Tandihí quivi nyatí tuhun chihi. Soco ñahri caa vatyí síí cuñi chihin ndo. Vatyí chinó ñni ndo chi Sutu Mañi yo Jesucristo. ³²Ñáá ri tuhun nyehí tindoho ñuu Éfeso tatu tyehe ta ma nandoto ca yo. Vaha taxin ca sacuvi yo tari catyí ñáyivi: “Na cachi yo, na coho yo vatyí tyaan isa cúvi yo”, catyí maa ñáyivi cha ña chitó.

³³Ma cuhva ndo cha sandavi ñaha ñu chi ndo. Vatyí iyó tucu tuhun cha catyí: “Tatu ñu tahan yo quíñi iyó ñu, cuví sativi ñu cuhva vaha cuahan yo.” ³⁴Saha ndo cuenda

cuhva iyó ndo. Ta ma sacuvi ca ndo cha quiñi caa. Vatyí chihin cuhva iyó suhva ndo chité tyi ña ñohó nuu ndo chi Nyoo. Catyí chi ndo tyehe caa vatyí nacoo ticahan nuu nuu ndo.

**Nu sañahá ra Pablo yoso caa
cusanandoto Nyoo chi yo
quivi quichi ra Cristo**

³⁵Soco yihí ndo ndacá tuhun ndo: “¿Yoso caa cunandoto ñu chihí? ¿Ñáá coño ñuhu cucuiso ñu?”
³⁶¡Tondo xaan xiñi ndo! ¿Atu ña chitó ndo vatyí tatu tachí yo noo chiti yutun, cuñi chi cha tyahyu soo chiti cuan? Tyicuan ta cañá noo yutun. (Chihí chiti cuan tacuhva na coo yutun cuan ñayivi.)³⁷Vatyí cha tachí yo ñima maa tun tachí yo. Soco chiti tun, an cuví ri nuñi, o trigo, o ñáá ndihi ca chiti.³⁸Ta cha cañá cuan Nyoo sacuví ra yoso cuhva cuñi maa ra chi noo noo cha cañá cuan. Vatyí siin siin cuhva caa noo noo nuu chiti.³⁹Ta tyicuan caa tucu tandihí coño ñuhu, ña iin ri caá chi. Siin caa coño ñuhu ñáyivi. Siin caa coño ñuhu cuñi. Siin caa coño ñuhu saa. Siin caa coño ñuhu tiyaca.⁴⁰Ta tyicuan caa tucu cha iyó andivi. Siin caa cha iyó yucuan. Ta siin caa tucu cha iyó ñuhu ñayivi ihya. Ta cha iyó nya andivi tyaquí xaan, ta cha iyó síqui ñuhu ñayivi tyaquí tucu cuan soco siin caa.⁴¹Cha ndichin ñanyii, ña inuu ri chihin cha ndichin yoo. Ta ña inuu ri chihin cha ndichin tiño. Ta tiño ña inuu ri chihin inga tucu tiño.⁴²Ta tyicuan caa tucu tuhun cha nandoto yo. Vatyí chicuchi yo noo coño ñuhu yo cha

tuhva tyahyu. Ta cunandoto yo soco chihin noo cha ma cúvi ca maa.⁴³Chicuchi yo noo cha numi ri tyahyu. Soco cunandoto noo cha tyaquí. Tyihi yo noo coño ñuhu pehe chichi ñuhú. Ta cunandoto noo cha nyee.⁴⁴Vatyí chicuchí yo coño ñuhu yo cuenda ñayivi ihya chichi ñuhu. Ta cunandoto noo cha ñima ca cuenda ñayivi ihya cuví, soco cuenda Nyoo andivi. Tatu iyó coño ñuhu yo ñayivi ihya. Suri coo tucu noo cha ñima ca cuenda ñuhu ñayivi, soco cuenda andivi.

⁴⁵Catyí tuhun Nyoo vatyí ra Adán ra cha chiyo cha xihna ri, chaha Nyoo ñayivi coo ra. Soco ra Adán cu uvi, ra cuví Cristo, cuví ra Tatyí Ii ta chahá ra noo ñayivi cha ma naa ca maa chi yo.⁴⁶Yucuan chaha, cha xihna ri tahán chi coo yo chihin coño ñuhu cuatyí yo. Ta yaha cuan ta coo yo cuenda Tatyí Ii Nyoo.⁴⁷Rayii cha chingo cha xihna ri, chihin ñuhú chingo ra. Ra cuenda ñuhu ñayivi cuví ra. Ta rayii cu uvi cha cuví Sutu Mañi yo, ra cuenda andivi cuví ra.⁴⁸Tandihí yo nyisó yo coño ñuhu cha chingo chihin ñuhú, tari coño ñuhu ra Adán. Ta cha cucuiso yo andivi cuví chi tari nyisó ra Cristo ra quichi nya andivi.⁴⁹Tari ndacú yo chi rayii, ra cha chingo chihin ñuhú, tyicuan caa tucu cundacu yo chi ra Cristo ra quichi nya andivi.

⁵⁰Ta cuñi catyí chi ndo yañi, vatyí coño ñuhu yo ma cuví quihvi chi andivi nu nyacá ñaha Nyoo. Noo cha tañi tyehe ri tivi ma cuví quihvi noo nu ña tivi.⁵¹Soco cuñi tyi coto ndo noo tuhun xehe cha yori maa chitó. Vatyí ña tandihí

yo cucúvi yo. Soco tandíhi yo ta cunasama cuhva caa yo. ⁵²Ta iin yaha cuui ri, tari noo cha ndahvá nuu ri yo, nu ndíhi tiví ángel trompeta. Vatyí cutiví ángel trompeta ta ñu ndíyi cunandoto ñu cha ma cúvi ca maa ñu. Ta Nyoo cunasama cuhva caá ñu. ⁵³Vatyí cuñí chi tyi nasama Nyoo coño ñuhu yo chihin noo cha ma naa ca maa. ⁵⁴Ta quívi cuan nasama coño ñuhu yo ta quehen yo cha ma tiví maa. Cua cuvi tari catyí nu libru Nyoo tyehe caa:

“Nyoo cuví chasaha ra chi tuhun chihi.”

⁵⁵Yoho, Tuhun Chihi, ¿nya nyaa tunyee iñi chuun vityin vatyí cahñun chi ndi?

¿Nya nyaa cha cua saha ganaun vityin, yoho Tuhun Chihi?

⁵⁶Vatyí cuatyí yo ican chahá cha cahñi tuhun chihi chi yo. Ta ley chahnu, ican cuví cha chahá fuerza chi chi. ⁵⁷Soco tyahví nyoo chi Nyoo, yañi. Vatyí sahá ganaa yo siquí cuan cha catyí Sutu Mañi yo Jesucristo.

⁵⁸Yucuan chaha yañi, na cuinanyaa yo chihin Nyoo chihin cha ñi iñi yo. Tyicuan ri na saha tyiño yo nu tyiño Sutu Mañi yo. Vatyí tyiño sahá yo chihin Sutu Mañi yo, ñima cha sahá tyiño caha ri maa yo cuví.

Chahá ra Pablo tuhun chi ñu Corinto yoso caa tyinyee ñu chi tahan ñu cuenda Nyoo

16 Ta tuhun cha tyinyee ndo xuhun chi ñu ndahvi, ñu yihí cuenda Nyoo. Cunyacuvi ndo tari catyí chi ñu nyicú tandíhi vehe

ñuhu ityi Galacia. ²Ma cuatu ndo nya quichi ta cuhva ndo xuhun. Soco tahan tahan nu ndíhi vitya ri ta tyihi siin ndo cha tahan chi cuhva ndo chi ñu, yoso cuhva cha chahá Nyoo chi ndo. ³Ta quívi cha quichi, cutachi nya ra cha cuñí maa ndo vatyí cunyaca ra xuhun cuan chihin carta chi tahan yo cha canyicú nya Jerusalén. ⁴Ta tatu tahan tucu chi cuhin, cuhun coyo ra chihin.

Yihí iñi ra Pablo nya ndíhi nu cucahan ra tuhun ra Cristo

⁵Cuhin nu nyicu ndo Corinto chiña, soco cuhun xihne ityi Macedonia. Vatyí ityi cuan cuyahi.

⁶Ta tatu chahá chi cuhva cundoí chihin ndo nyacua nya yahá yoo vichin. Tyicuan ta cuví tyinyeé ndo chiin chii ta cuhin inga ñuu.

⁷Ña cuñí cha iin yaha ri yahi nu nyicu ndo. Vatyí cuñí ndoi suhva quívi chihin ndo tatu Sutu Mañi yo ta cuñí ra. ⁸Soco cunyai ñuu Éfeso ihya, nyacua nya yaha quívi cha sanducahnú ñu Israel vico Pentecostés. Tyicuan ta quichi nu nyicu ndo. ⁹Cundoí suhva ihya vatyí vasi cuaha xaan ñáyivi ña cuñí nyehe ñu tuhun Nyoo, soco chahá xaan chi cuhva cahín tuhun Nyoo chihin ñáyivi ñuu ihya.

¹⁰Tatu chaa ra Timoteo, na cunyaa ra chihin ndo. Ta vaha tyiñuhu ndo chi ra. Vatyí sahá tyiño tucu maa ra cuenda Sutu Mañi yo tari mai. ¹¹Ta vaha coo iñi ndo nyehé ndo chi ra. Ta tyinyee ndo chiin chi ra tyi quichi ra nu nyaí. Vatyí nyatí chi ra chihin inga yañi yo.

¹²Ta yañi yo, ra Apolos, chacu ndahvi xain nuu ra nacuhun ra chihin inga yañi yo nu nyicu ndo. Soco ña cuñi ra. Soco cuhun maa ra nacuhva chi cuhva chi ra, na.

Chahá ra Pablo nocumi chi tandihi ñu yihí cuenda Nyoo ñuu Corinto

¹³Sañihi ndo chinó ca iñi ndo chi Nyoo. Ta cunihí iñi ndo ta nacoo vaha fuerza Nyoo chi ndo. ¹⁴Tandihí cha sacuví ndo, sacuvi ndo cha cuenda cha cuñi ndo chi Nyoo ta chi tahan ndo.

¹⁵Chitó ndo yañi vatyí ñáyivi chi ra Estéfnas xihna ca ñu chinó iñi tuhun ra Cristo ityi Acaya chiña. Ta vityin sacuví ñu tyiño nuu ra hermano. ¹⁶Ta catyí chi ndo vatyí saha ndo ñáyivi chi ñu cha iyó tari iyó ñu chiña, ta chi tandihí ñu cha tyinyeé ta sahá tyiño cuenda Nyoo.

¹⁷Ta cusihí xaan cuñi cha quichí coyo ra Estéfnas ta ra Fortunato ta ra Acaico. Vatyí maa ra catyinyeé ra chi ndi. Vatyí tandihí ndo ña cuví quichi ndo vatyí cañi xaan ñuu

ndo. ¹⁸Soco maa ra quichí coyo ra. Ta sandunyeé ca ra iñi chihin tuhun Nyoo. Tari sandunihí ra iñi nyoho ñandihí. Ta vaha coo iñi ndo nyehé ndo tyiño casacuví ra. Vatyí maa ra iñi ri chi Nyoo canyicón ra.

¹⁹Ta vachí nocumi chi ndo sahá tandihí yañi yo ta tahan yo cha ndu iñi ri ityi Asia ihya. Ta vachi tucu nocumi chi ndo sahá ra Aquila ta cu Priscila, ta ñu yihí cuenda Nyoo cha ndu iñi ri vehe ñuhu nu cuví vehe ñu. ²⁰Vachi nocumi chi ndo sahá tandihí yañi yo, ta nacuhva maa ndo nocumi chi noo noo ndo nu nyicú ndo chiña.

²¹Nocumi cha vachí chi ndo ihya, yuhu ra Pablo tyaj chihin ndahi.

²²Tatu nya ñáyivi ña cuñi chi Sutu Mañi yo Jesucristo, nacuhun ñu anyaya. Soco yuhu catyí: ¡Sutu Mañi yuhu, ñaha!

²³Ta nasoco Sutu Mañi yo Jesucristo chi tandihí ndo. ²⁴Ta catyí chi ndo vatyí yuhu cuñi chi tandihí ndo cha cuenda ra Cristo Jesús. Ta nacuví chi tyicuan caa.